



澳門特別行政區 立法會會刊

DIÁRIO DA ASSEMBLEIA LEGISLATIVA DA REGIÃO ADMINISTRATIVA ESPECIAL DE MACAU

第五屆立法會

第四立法會期（二零一六—二零一七）

第一組

第 V-96 期

V LEGISLATURA

4.ª SESSÃO LEGISLATIVA (2016-2017)

I Série

N.º V-96

日期：二零一六年十一月十六日

運輸工務司司長羅立文

開始時間：下午三時正

廉政專員張永春

結束時間：下午六時二十一分

審計長何永安

警察總局局長馬耀權

地點：澳門南灣湖畔立法會前地立法會大樓全體會議廳

海關關長黃有力

行政長官辦公室主任柯嵐

主席：賀一誠

行政法務司司長辦公室主任丘曼玲

經濟財政司司長辦公室主任陸潔嫻

副主席：林香生

保安司司長辦公室主任張玉英

社會文化司司長辦公室主任葉炳權

第一秘書：崔世昌

運輸工務司司長辦公室主任張翠玲

廉政專員辦公室主任王衛東

審計長辦公室主任何慧卿

第二秘書：高開賢

行政會委員梁慶庭

行政會委員廖澤雲

行政會委員馬有禮

出席議員：賀一誠、林香生、崔世昌、高開賢、馮志強、關翠杏、歐安利、吳國昌、張立群、徐偉坤、陳澤武、鄭志強、區錦新、黃顯輝、高天賜、崔世平、梁安琪、陳明金、劉永誠、麥瑞權、蕭志偉、何潤生、陳美儀、唐曉晴、梁榮仔、陳亦立、陳虹、鄭安庭、施家倫、馬志成、李靜儀、黃潔貞、宋碧琪。

行政會委員何雪卿

行政會委員黃如楷

行政會委員林金城

行政長官私人助理譚嘉華

列席者：行政長官崔世安

行政法務司司長陳海帆

經濟財政司司長梁維特

保安司司長黃少澤

社會文化司司長譚俊榮

議程：議員就 2017 財政年度施政報告內容向行政長官提問及行政長官回答有關問題。

簡要：行政長官回答了三十二位議員就 2017 財政年度施政報告內容提出的問題。

會議內容：

主席：各位議員：

現在開會。

今日的議程是行政長官回答議員就 2017 財政年度施政報告提出的問題。

以立法會的名義歡迎行政長官閣下、行政會委員及各位官員列席今日的會議。

執行委員會第 27/2013 號議決規定各位議員按報名次序，每次只能提出一個問題。議員提問的時間不超過兩分鐘。提問以循環形式進行，直到會議結束。會議由三點到六點。

有三十二位議員報了名。行政長官將回答完三十二位議員的提問，會議才結束。期間休會半小時。

根據報名次序，現在請陳明金議員提問。

陳明金：多謝主席。

行政長官閣下：

近兩年澳門的人均居民總收入約 60 萬，即係每月人均 5 萬，而同期居民的收入中位數係 1.8 萬，反映貧富差距之大。

以一個家庭嚟計，夫妻兩個人每月收入約 4 萬蚊。呢個收入水平夾心階層，喺澳門絕大部份政府經濟援助、扶助弱勢嘅福利均無辦法享受。而扣除供養父母、子女、房租或者按揭供款、交通電訊、伙食等生活基本開支，幾乎月月清，情況可能與接受政府援助嘅人士差唔多。但係呢部份人士，幾乎係隔離喺政府各種援助措施之外，又即係講在職貧窮。

目前，澳門只有最低維生指數嘅規定，從 2016 年 1 月 1 號開始，調整到 4,050 元。相比香港設有扶貧委員會，以每月入息中位數嘅百分之五十，界定為貧窮線。按照香港嘅標準，澳門嘅最低維生指數，遠遠低過貧窮線以下。

政府一直強調，將改善民生放喺施政嘅首位。請問行政長官閣下，對於在職貧窮，中下層公務人員、低收入人群、群體等，政府有咩嘢進一步嘅針對性嘅扶助措施？整體嚟講，點

樣能夠透過二次嘅分配，切實推動全民合理共享經濟發展嘅成果？

多謝。

主席：請行政長官閣下。

行政長官崔世安：多謝主席，多謝陳明金議員嘅發問。

喺國際上對於貧窮係有唔同嘅理解，一般係劃分為絕對貧窮同埋相對貧窮。而絕對貧窮係個人收入未能夠滿足到基本生活所需要，而相對貧窮就係一啲人生活嘅水平低於所屬社會嘅主流生活水平。

在職貧窮喺任何嘅社會都係均有客觀存在嘅現象出現，係個人嘅收入因為職業類別、教育嘅水平、競爭力等唔同嘅因素造成咗差異。唔同嘅產業之間，亦因為公共政策、發展周期、人力資源供求等不同而呈現咗收入嘅差距。

剛才談及嘅香港貧窮線，根據我哋取得嘅資料，係喺 2013 年，香港制定咗貧窮線，以家庭住戶收入中位數一半劃定。而 2015 年，香港一人家庭嘅貧窮線，係為每月 3,800 元。而澳門，剛才陳議員亦都談及到我哋嘅最低維生指數，目前係 4,050 元。亦都我哋係有一個追蹤嘅系統係跟進，例如通脹等，嚟到去將呢個維生指數係調嘅。

我諗頭先講咗幾個問題，我嘗試去回答。

第一關於中下層，或者收入比較低嘅，其實政府做咗好多嘅工作，包括咗社會福利裏面多點嘅支撐。而收入高嘅，當然大家都明白，付稅當然會多，呢個亦都係社會嘅正常嘅現象。而剛才陳議員問到嘅，我諗好重要嘅就係關係到呢個夾心階層。而夾心階層裏面，係有通過第二次分配，嚟到去支持嘅。我舉幾個例，譬如我哋嘅退稅百分之三十，例如我哋普及嘅支持全澳市民。另外多個長效機制，特別我要提嘅係教育嘅機制，提供咗呢個公平嘅教育機會，係讓我哋澳門嘅人，係能夠係有呢個接受教育機會。

但係現在我諗最關鍵嘅就係住房嘅問題。因為根據我哋政研室俾我嘅資料，目前嚟講，喺澳門收入嘅總和，一個家庭要負擔去供樓，或者住房嘅支出，係高於我哋希望嘅水平，而影響咗佢哋生活嘅素質嘅。呢個，我今日有一啲資料，如果主席

容許，我會提交俾主席，俾各位參考。事實上澳門係比較高，亦都係僅次於香港，呢一方面會影響咗長遠佢哋嘅生活素質。因為大家都知道，現在去供一層樓，係一個好長嘅時期。對於兩個夫婦，作為家庭支柱嚟到計，係付出咗佢哋超過百分之四十，係會有影響佢哋嘅生活素質嘅。

呢個我諗政府係，特別喺呢段時間，係盡我哋嘅最大嘅力量，係喺五年規劃裏面，亦都係明確，我哋希望能夠有足夠嘅土地儲備，呢個包括咗公共房屋，亦包括咗私人發展嘅住宅。喺呢啲方面，希望個供求能夠平衡，讓到而家比較貴嘅樓價，係得以下降。目前依然我哋係覺得，呢個樓價係高嘅。所以喺呢個五年規劃裏面，我哋係好積極去做呢個土地儲備。亦為呢個公共房屋，係盡我哋嘅能力，去尋找土地嚟到建。但係公共房屋方面，我哋有幾個方面嘅工作要做。一個大家係知道，做呢個研究，係修改法律；一個係要找到足夠嘅土地去供應；另一個就係真正嘅需求量，我哋點樣能夠評估到，嚟到係長遠去解決呢一個問題。因為如果你每一個月嘅整體收入係付咗樓方面咁高嘅話，係講緊十五年，講緊二十年，你都要付出係咁高嘅比例喺個收入裏面，係事實會影響咗個生活素質嘅。

至於點樣為呢個夾心階層，特別喺第二次分配裏面，呢個我哋亦都會聽陳議員嘅意見，我哋再研究。但係最緊要係整體嘅財政收入，同埋我哋嘅財政係穩健，有盈餘嘅時候，喺呢個共建、共享嘅精神上，係諗多一啲係為中層。因為而家講到大概你兩人嘅收入，係有呢個譬如兩萬蚊一個，大概兩個四萬蚊嘅話，即係呢一個係其實係客觀現實嘅。佢唔係擺到政府嘅福利，但係佢自己亦都唔係高收入。所以，譬如過去幾年嘅通脹影響佢好大，樓價嘅飆升亦影響好大。

所以喺呢幾方面，我哋會從呢個第二次分配，亦都會重新考慮。因為退稅已經做咗幾年，我哋亦都係呢個係為咗中層人士特別受益嚟到去做。喺呢一個就業援助、制度建設、教育公平，政府二次分配等，我哋亦都會多管齊下，係希望能夠未來更幫得到。但係今日我想講嘅主要都係住房嘅問題，令到佢整個家庭嘅支出，事實係佔個比例過高。因為我哋睇到，有一啲唔止係 40%，係有嘅達到百分之六十嘅收入。呢個如果長期，對個家庭真係產生好大嘅壓力。亦對個家庭，整個和諧嘅家庭，有時缺錢就真係影響好大，因為將最大嘅比例擺咗喺供屋、住屋嘅方面。我哋會落實去關注嘅。公務員我哋亦都會係全面檢討，係去關注嘅。

多謝主席。

主席：宋碧琪議員。

宋碧琪：多謝主席。

尊敬嘅行政長官閣下：

行政主導係澳門政治體制嘅核心，特區政府則成為咗澳門發展嘅最關鍵主體。社會係一直支持同埋相信特區政府能夠為澳門人帶來一片新天地，更加期望特區政府喺閣下嘅帶領下，係創出新景象。居民係好高興見到長官喺過去嘅經驗上，提出咗“善治”嘅施政理念。

正所謂“打鐵還需自身硬”，喺過去一年，政府推行精兵簡政，更透過架構嘅重整，人員嘅控制等，依序係展開落實。但係長期困擾社會嘅住屋、交通、醫療、養老等民生嘅政策嘅突破點仍然係比較低，使得居民對於行政改革係不為所動，更加多嘅要求政府要即時作為。為此磨刀已經唔係現實，下刀解決問題可能先係正道。

澳門嘅發展係居民與特區政府嘅共同期望，居民給予官員意見，係希望大家越做越好。但係出到嚟嘅結果，卻變成咗遺憾，甚至係非友即敵。而有啲官員嘅不作為，亂作為，甚至將一啲問題政治化，政治司法化，使得社會嘅矛盾係更加劇烈。呢一種官員嘅態度係不利於特區政府嘅管治威信嘅提升，甚至係不利於整個體制嘅發展，最終為官者所造就嘅，將會係人心嘅背離。

為此請問閣下，隨著社會矛盾嘅加劇，未來將如何下刀深化行政改革，提升行政效率，貼近社會嘅發展呢？官員嘅作為係直接影響特區政府嘅施政，態度更加決定高度，但係喺缺乏問責制下，官員不為所動，政府除咗引入第三方評鑑機制外，未來還有何行動促進官員嘅作為呢？

多謝。

主席：請行政長官閣下。

行政長官崔世安：多謝主席，多謝宋碧琪議員。

行政主導體現咗《基本法》裏面多個條文，作為我哋特區政治體制嘅基本原則。要實現行政主導，其實最重要係得到廣大市民嘅支持。民意嘅支持係非常之重要，亦係我哋嘅基

礎。喺呢種嘅良性互動之下，作為行政主導嘅政府，先能夠發揮。

我今日聽到宋碧琪議員所問嘅，就係對我哋嘅管治團隊裏面，某啲嘅官員係作一個反映。我作為行政長官，好應該去聽取呢啲意見。個理由喺邊度呢？做得啱嘅，我啲同事係值得讚賞；但係做得唔啱嘅，基本上我有責任，因為呢個係我應負嘅政治責任。所以我覺得，我哋應該好認真咁樣去聆聽。加上我哋接受批評，更加應該有謙卑嘅心去面對問題。

因為頭先講嘅係非常嚴重嘅，個問題喺邊度呢？就係如果我哋作為一個服務型嘅社會，我哋對民意，對議員閣下嘅意見唔重視，佢最終只會係好難向前推進我哋嘅政策，我哋嘅措施，或者我哋嘅目標。

所以，我哋始終，特別係我個人認為，係應該懷著謙卑嘅心，係對著廣大市民去聽取意見。當然，科學施政裏面，我哋好清楚，我哋亦都要分析，乜嘢係需要？乜嘢係訴求？呢個之間亦有差距。訴求同埋需要，我哋可以通過基礎研究、科學分析嚟去訂定。但係，點都唔會係背離咗民意嚟到喺搞出剛才閣下所談及嘅，有唔同嘅方向，更加將佢例如政治化、司法化呢啲方面。

我自己認為，最少有三個標準好重要，一個就係是否執行落實達成咗既定嘅施政目標。譬如我哋每一年嘅施政方針，我哋嘅五年規劃。第二個係是否能夠自己講出嚟要做嘅嘢係可行達到承諾。而第三就係施政措施嘅結果最緊要係咪同民意係背道而馳。因為無咗呢個基礎，我哋係離開咗“執政為民”嘅呢個道理。

當然，每一個人都係人，佢始終會有疏忽，會有錯漏，當然唔係喺刑事、貪贓枉法呢啲。而係喺行政裏面，每日要做好多決定，所以呢個點解要科學施政，點解要聽咁多意見，我諗呢個俾一個好嘅機會我哋整個團隊檢討一下，亦都係因為已經明年踏入咗本屆政府嘅屆中，我作為呢個團隊嘅負責人，好應該係聽到咁嘅意見去檢討一下。我相信亦都唔使客氣，如果有時間，可以直接搵我講一講，深入啲我哋邊啲方面，我亦好樂意去聽取。

因為其實無論乜嘢嘅管理學，我諗最重要都係要面對到問題，先至去解決問題所在。一個咁龐大嘅隊伍，裏面我哋嘅每一個環節，特別我講嘅係領導主管職位。大家都知道，喺《基

本法》裏面，司、局、廳、處，係領導同埋主管嘅職位裏面，佢牽涉咗政策，執行權，同埋落實呢啲措施。喺個段期間裏面，聽到呢啲反映，我覺得，每一個做領導嘅，佢可能有唔同嘅風格，有啲領導佢高調啲，有啲領導佢低調啲。有啲領導佢有唔同嘅風格去處理，但係個目標應該總係一致，係根據施政嘅目標，根據五年規劃訂定，是否能夠達到目標。

好似今日咁談及提升行政效率、官員問責，有另一方面，有時我哋好努力做嘅事，亦都未能夠達標嘅。因為好多客觀嘅因素，令我哋主觀嘅願望，唔係可以咁容易達成。但係通過溝通，起碼我哋有一個機會，能夠大家作一個解釋說明。因為大家其實同一個心，都係為澳門廣大嘅市民服務，為澳門廣大市民嘅福祉謀求進步，亦都希望能夠提升到行政效率，官員亦都係應該負我哋應負嘅責任。

多謝主席。

主席：施家倫議員。

施家倫：多謝主席。

尊敬嘅行政長官閣下：

特區政府深知住屋問題牽涉到社會和諧穩定，一直以來將佢擺喺施政嘅優先嘅位置，強調會公私並舉，做好安居嘅工作。喺今年嘅施政報告當中，閣下亦都承諾，會喺短、中、長期內興建四萬幾個公屋單位，保障居民嘅安居樂業，相關嘅做法得到好多居民嘅讚賞。

但係，我哋睇到，政府喺房屋範疇上面，亦都存在一啲不足。例如房屋，社會房屋缺乏恆常申請嘅機制。唔少弱勢家團無辦法得到及時嘅援助。經濟房屋存在設計落後，質量不佳。單位越做越細，做契緩慢等等嘅問題。喺私樓市場，亦都有唔少居民喺置業權益無辦法得到保障。譬如，閣下高度重視嘅“海一居”問題，糾纏至今，發展商無善後方案，政府專案小組亦都有同小業主進行坦誠嘅溝通。

喺我哋協助處理珠海摩爾廣場同埋時代廣場嘅時間，我哋睇到，珠海政府嘅公檢法工作小組，積極主動推動三方嘅會談，當中嘅態度值得我哋嘅官員學習。

請問行政長官閣下，幾時會重開新一期公屋申請，回應市

民嘅訴求？會唔會參考鄰埠香港嘅做法，承諾公屋三年上樓？以及將來會點樣督促官員，主動協助“海一居”嘅小業主呢？

多謝。

主席：請行政長官閣下。

行政長官崔世安：多謝主席，多謝施家倫議員。

我諗其實大家都係同一個目標，好關心公共房屋政策。特區政府喺呢幾年嚟，亦都係好積極去為呢個公共房屋嘅政策，我相信亦都做咗大量嘅工作。喺之前嘅萬九公屋計劃，現在接住落嚟，我哋三項嘅工作，喺羅司長嘅領導下，係同步進行嘅。一個大家知道，係要做一個研究，就係總嘅公屋嘅需求量嘅問題；一個就係修改法律嘅問題；一個就係我哋尋找到適當嘅土地。

我哋好高興喺執行呢個新《土地法》裏面，同埋喺訴訟裏面，係得到一啲嘅土地嘅重新使用權。我哋係特別偉龍馬路，係能夠建比較多嘅公屋單位，我哋已經進入咗規劃嘅階段。但係恆常嘅機制，因為無論係社會房屋嘅法律制度，或者經濟房屋嘅法律制度，佢係有所限制，我哋係要符合條件先至能夠開隊。呢個我哋一定會盡我哋嘅能力嚟到去做。

但係我哋好有信心，喺未來，特別係根據五年規劃我哋所公佈嘅，係設立到土地儲備，有序咁樣規劃，同埋完善配套，去提升呢個質量。喺我哋長遠裏面嚟到啟動到呢個公共房屋嘅發展規劃，同埋喺呢個監管嘅機制。喺加快經屋做契嘅進度，積極優化經屋做契前嘅資格審查，同埋發出許可書嘅工作，已經增加咗私人公證員外判嘅數量。

關於呢個“海一居”嘅問題。自“海一居”嘅事件發生後，其實政府一直係密切關注事件嘅進展。尤其係關於發展商對政府宣告土地批給失效嘅批示提起嘅司法訴訟。早前終審法院就發展商終止行政長官宣告批示失效行為嘅批示效力保存請求，作出最終駁回嘅裁決。然而呢個裁決，只係針對呢個批示嘅保存措施作出嘅決定，但係唔係針對撤銷批示嘅司法上訴最終決定，呢部份嘅司法上訴，依然喺法院審理之中。作為特區政府，始終我哋係有法律嘅依據同埋進行執法，所以必須係要依法等候法院嘅裁決嘅。

談到呢個“海一居”嘅事件，其實我相信我哋嘅團隊，包括同我工作嘅三位司長，陳海帆司長、梁維特司長同埋羅立文司長，我哋一樣咁關心“海一居”嘅小業主。自“海一居”嘅事件發生之後，大大小小我哋做嘅工作會議，我哋嘅法律團隊，不下幾十次，我自己亦都參加咗好多次。政府做任何嘅工作，必須係依據法律，依據新嘅《土地法》去執行，而亦都係根據法律嚟到去處理。我哋嘅團隊亦都係提出咗，向呢個檢察長係徵求呢個法律意見，亦都係得到咗回覆。

喺新嘅《土地法》裏面，呢個二十五年嘅期，好明確，大家可以睇返一部份嘅裁決，行政長官亦都無權喺呢度作出決定，呢個係法律明確。喺個法律明確同埋喺個裁決未出之前，而家你話我哋政府係點樣去同呢啲小業主，可以提出一啲我哋嘅保證呢？我哋一定要等裁決出咗之後，喺我哋能力範圍內，我哋俾最大嘅保證同埋支持業主。唔係代表我哋唔關心佢，我哋真係好關心買咗“海一居”嘅小業主。我哋亦都係做咗大量嘅工作，但係我哋係特區政府，我哋不能夠唔依法。作為行政長官，亦都係要對法律負責任，亦都係執行法律必須要具備嘅條件。所以我哋三位司長，無論喺處理呢個事件裏面，包括咗稅項、土地，將來如果嗰個判決出現嘅問題係點樣處理等等假設，我哋內部亦都做咗好多分析同埋研究。

我哋唔係唔關心，我哋亦都唔係話唔想去處理得到。而係喺一個訴訟關係裏面，我哋始終都係明白到司法係獨立，而且只服從法律，最後亦都係要等呢個裁決出。呢個唔係我想以及或者我唔想去做嘅事，而係我能夠做或者唔能夠做嘅事。我只能夠依法去做。我哋三位司長，包括埋檢察長嘅辦公室，事實上為呢個事已經係做咗我哋大量嘅工作，嚟到去決定。

大家可以回顧返，喺起初嘅時候，大家關心嘅公共利益，我哋真係幾個辦公室，特別行政法務嘅辦公室，以至到檢察長嘅辦公室，俾出咗意見：呢個唔係公共利益。當時係做咗大量嘅工作。我哋唔係唔想去解決。政府去做工作，一定係要依法去做。喺裁決出咗之後，我哋一定會履行我哋嘅責任，喺我哋法律容許能力範圍內。其實同施議員一樣，我亦都係咁關心呢一批嘅業主。我哋一定喺能力範圍內去做。目前我哋呢一個階段，其實係無具備法律同埋事實嘅基礎作任何決定，所以我哋只能夠係等待司法訴訟嘅最終結果，先至可以制訂到處理嘅方案。呢個希望閣下能夠明白，亦都希望“海一居”嘅小業主能夠明白。

多謝主席。

主席：劉永誠議員。

劉永誠：多謝主席。

尊敬嘅行政長官閣下：在五年發展規劃文本中，確立咗澳門經濟多元化發展嘅目標。而在 2017 年財政年度嘅施政報告入面，就提出以明確嘅政府政策，重點推動經濟型酒店，特色主題公園，綜合購物中心等設施嘅建設，為遊客提供多元化嘅住宿選擇，同埋適合家庭客群嘅旅遊同埋購物嘅項目，從而係吸引唔同類型嘅遊客。呢項施政方針，係符合咗推動經濟適度多元嘅發展路向，尤其係本地經濟仍處於調整嘅階段，有必要探索促進經濟穩健發展新嘅增長點。

請問行政長官閣下，在實際嘅執行上面，有咩傾斜性嘅政策，去鼓勵上述嘅項目設施嘅建設呢？

多謝。

主席：請行政長官閣下。

行政長官崔世安：多謝主席，多謝劉永誠議員。

喺今次嘅施政報告裏面，係明確列明咗特區政府係因為要達到我哋嘅目標，作為世界旅遊休閒中心，係作咗一啲傾斜性政策支持嘅論述，亦都係呢個經過澳門旅遊業發展總體規劃嘅研究，係得出嚟嘅。呢個研究亦都係由旅遊局係聘請咗專業公司，經過長時間係做嘅。

我哋特別喺幾個方面，第一就係經濟型嘅酒店，向旅客提供多元住宿嘅選擇。16 年至到 6 月，五星級酒店係佔全澳酒店房嘅百分之六十四，比起 2005 年嘅百分之三十二，足足上升咗一倍。所以其他類型嘅酒店房嘅比例低，係有呢個迫切性要發展嘅。因為我哋作為一個世界旅遊休閒中心，我哋亦都係有唔同嘅客群。譬如會議展覽，但有工作嘅客群，亦有客人嘅客群，我哋係需要嘅唔同嘅酒店。

第二個特色主題公園，同唔同嘅遊客群體，提供多元化旅遊項目。澳門有豐富嘅旅遊資源。大家都知道，我哋既有世界文化遺產澳門歷史城區，亦有現代化呢個博彩公司投入嘅多個綜合嘅項目。但係我哋亦有條件係要建一啲有特色嘅主題公園，因為係針對家庭嘅客群，而且亦係未來澳門旅遊發展嘅重要目標嘅群體。特色嘅主題公園既能夠提升對家庭客群來澳嘅

旅遊吸引力，亦都係係拓寬咗本地居民休閒旅遊娛樂嘅空間。事實上我哋目前，喺本地區，真係缺乏特色嘅主題公園嘅，呢個我哋係希望能夠發展。

第三條綜合購物中心。根據預測，2015 年澳門嘅零售空間總面積係達到 190 萬平方米。到 2025 年，澳門需要嘅額外係增加 36 萬平方米嘅零售總面積，以滿足遊客同埋居民嘅需求。中心亦都可以容納本地品牌，零售業，展示同埋文創產品、美食等等嘅。

主要我哋嘅傾斜政策，係希望能夠幫助到中小企，其有機會優先參與呢個發展項目裏面嘅工作，亦都配合呢個世界旅遊休閒中心嘅建設，應有發揮嘅作用。喺土地資源方面，亦作出策略性嘅支持，係達到可持續發展，能夠為旅遊業可持續發展係作出咗應有嘅支持嘅。

呢個研究係除咗做咗好耐得出嘅結論，但係亦都係一個實際嘅問題。澳門其實經過好長嘅時間，亦都擺過好多嘅獎項，作為一個世界旅遊嘅目的地。但係我哋要發展成為世界旅遊休閒中心，我哋嘅客源群體，係事實我哋係需要更加拓寬我哋嘅領域嘅。大家好清楚，目前我哋嘅客源係大中華佔咗極大嘅比例，中國內地、香港、台灣，已經佔咗大概九成，所以我哋嘅國際客增長係有，但係同整體嘅比例，你會覺得唔高。

但係要從一個長遠發展目標。作為世界旅遊休閒中心，目前我哋頭先所提及嘅幾點，特別係主題公園，係我哋事實係缺乏嘅。傾斜嘅政策去支持主題嘅公園，係從研究同埋實質嘅出發，係有幫助。一方面亦都係提供咗更多嘅就業機會，俾到澳門喺唔同嘅領域裏面。所以我哋今次喺呢一個施政報告裏面，係作出咗呢個論述，同埋作為係傾斜政策，亦都會係必定會根據法律嘅要求，係嚟到去推動嘅。

多謝主席。

主席：多謝。

麥瑞權議員。

麥瑞權：多謝主席。

尊敬嘅行政長官閣下：

特區政府要接收好中央政府嘅大禮，就必須要全力鞏固自身嘅基礎，同埋提升綜合實力。例如，喺培養應用性人才方面嘅職業教育，至今學校嘅建設，師資嘅投入，教材、課程嘅設置，同埋同大學嘅學分制嘅掛鉤，仲未落實。

第二，喺中葡語國家貿易合作方面，需要大量嘅中葡雙語人才。尤其是係專業嘅翻譯、法律、會計體制嘅人才嚴重不足。另外，澳門要可持續發展，就一定要大家要團結一致。所以，必須要以史為鑒，共同建立共同嘅目標同社會價值觀。甲午之戰就係一個好好嘅教育案例。但係而家嘅歷史教科書，都無統一嘅歷史教材，同埋嚴重缺乏專業嘅教歷史嘅老師去教學生，所以好多年青人，好難清晰同埋正確認識到國家同埋澳門嘅歷史。唔清楚認識，當然好難產生認同感，點會對社會嘅健康發展會有好處呢！所以影響會好深遠。

對此，請問行政長官閣下，喺鞏固基礎同提升方面，我哋嘅歷史科，幾時先有統一嘅教材，同埋足夠教歷史科嘅專科老師去教學生呢？而喺培養應用性人才嘅職業教育制度，同埋中葡雙語專業人才嘅培育方面，又能唔能夠配合到社會未來發展嘅需要呢？喺唔能夠配合嘅情況之下，政府將有咩部署同埋應對呢？而回歸十六年以嚟，有無對上述嘅問題做過績效評估呢？

唔該。

主席：請行政長官閣下。

行政長官崔世安：多謝主席，多謝麥瑞權議員。

關於呢個歷史教育，特別係歷史科師資以及教材嘅問題，我係好同意議員提出，係好重要嘅。特別加深我哋嘅青少年，對祖國同埋澳門歷史，同埋傳統文化嘅認識，培養佢哋愛國愛澳嘅情懷。政府今年亦都修訂同埋出版咗品德與公民教材，當中亦都包含咗中國同埋澳門嘅歷史內容。最近我哋嘅教青局，已經同人民教育出版社係經過探討之後，取得共識，係將共同組織編寫同埋出版初中同埋高中嘅中國歷史教材，並於2019/2020 嘅學年全面使用嘅。

現在喺本澳中學歷史科教師一共有 251 人，其中專任嘅教師有 115 人，兼任嘅教師係有 146 人。政府係會加大力度，係通過各種方式，爭取培養係更多歷史嘅教學人員。即係換句話講，其實達到呢個共識，係同呢個人民教育出版社同教青局將

會有我哋嘅專用嘅教材喺 2019/2020 學年，就會全面使用嘅。對我哋嚟講，係一個新嘅，亦都係達到剛才閣下所提出呢一個嘅關心。

政府其實一直都重視同埋不斷創造良好嘅條件培養應用人才、專業人才同埋精英人才。呢個喺人才發展委員會裏面，係做咗大量嘅工作。當中亦都包括咗中葡雙語嘅人才。但係人才嘅培養，其實好關係兩個方面，一個方面就係市場嘅需求，同埋市場嘅導向。係要結合到整個經濟社會發展嘅規劃，同埋產業發展嘅需求。亦都要客觀科學咁樣評估我哋嘅人才培養政策。

而家大家都好關心，需要更多嘅中葡人才，我諗一個係市場嘅需求同埋導向，另一個就係我哋要能夠提供呢個教育機會，俾到希望能夠進修中葡雙語嘅人士。澳門過往係有比較好嘅基礎係訓練呢個葡語嘅。我哋能夠係促進呢一方面，係比其他地方相信係有優勢，我哋亦都會係盡我哋嘅能力去做。

喺呢一個培養方面，剛才講嘅幾類，我哋覺得，應用人才一般大概係要三至五年；專業嘅可能長一啲；精英嘅人才可能需要超過十年，甚至更長嘅時間。所以我哋要睇個市場嘅需求同埋導向。而且而家嘅學生亦都會好聰明，佢會睇到佢嘅前景，佢自己嘅生涯規劃點樣去安排，然後佢去讀佢嘅學科。將來佢學以致用，亦都能夠係滿足佢自己嘅要求嘅。但係，政府係會係好努力咁樣係提供呢個學習嘅機會，特別係為呢個雙語人才嘅培訓。我哋亦都係因為總理訪澳嘅時候，係俾嘅措施同埋優惠嘅政策，其中包括咗希望培訓更多嘅雙語人才。我哋會係澳門係相應係嚟到建立呢個培訓嘅基地。

但係有一樣我哋要談一談，就係我哋過去培養咗咁多嘅葡語人才，喺本地學習或者離開咗澳門赴葡學習，我哋其實係需要建立返一套機制去評估佢哋嘅水平。因為語言其實學習唔難，學習到個水平到底能夠達到係咩嘅程度呢？呢個我諗未來我哋係需要係建基喺呢個評估嘅基礎，要有返一個評估嘅中心，嚟到將送出去或者喺本地學習嘅，係有一個評估，令到佢嘅程度得到確認，呢個會係研究去進行。

多謝主席。

主席：李靜儀議員。

李靜儀：多謝主席。

行政長官：

房屋問題唔單止係要關心，重在係落實。政府曾經表明，爭取喺 2012 年底，係興建萬九個公屋單位。但係直至 2015 年底，如果扣除拆卸重建嘅公屋，期間實質嘅增加，只係有 15,865 間公共房屋。而加上經濟房屋，喺 2005 至到 2010 年嘅樓價飆升期間，連續係多年零供應，萬九計劃，其實實際上只能夠用作還舊債。公屋供應不足不穩，令到居民係喺憂慮同埋恐慌性需求之下，係整個房屋問題嘅核心。呢十幾年樓價升咗超過十倍，遠超居民嘅負擔，而廣大概中下階層只能夠指望公共房屋，所以就出現數萬家團爭千九單位呢種情況。

房屋永遠係穩人心、穩社會嘅基礎。好多居民都同我講，房屋問題係佢哋最大嘅壓力。亦都有唔少人係擔心，佢嘅子女蝸居都無，將來點樣組織家庭呢？政府成日就話，手頭上土地唔多，但係而家你收咗咁地，擺喺度又唔見盡快興建公屋。而所謂嘅短中期興建萬二個單位，亦都只係規劃研究階段。而即使動工，社會亦都好擔心，就正如一啲項目，無辦法準時完工。睇返呢幅圖，14、15 年又變返零供應嘅狀態。供應咁飄忽，居民何來安心呢？

而事實上，要解決房屋居住難嘅問題，關鍵就在於有明確穩定嘅供應目標同埋規劃。請問行政長官，而家有待規劃嘅萬二個單位，到底幾時先至有明確嘅興建計劃同埋落成嘅時間表呢？而長遠嘅公共房屋目標同埋規劃係點樣呢？亦都希望你能夠繼續承諾同埋回應，落實“澳人澳地”政策。究竟有啲乜嘢嘅方案，將來將土地用於回應居民嘅住屋、教育、社區配套同埋民生需求？而最後，長官，“海一居”嘅事件，唔單止係關注，亦都希望你能夠及早有一啲嘅方案，因為無論訴訟勝定敗，你哋都應該要早作準備。

唔該。

主席：請行政長官閣下。

行政長官崔世安：多謝主席。

我諗首先講返“海一居”先。呢個係政府嘅立場，喺訴訟嘅結果未出之前，政府係唔會公佈我哋嘅方案出嚟。

我諗希望能夠諒解同埋理解我哋，政府亦有原則。因為法律訴訟，我哋係等到裁決嘅結果，我哋就會盡我哋嘅法律容許

嘅範圍內，去作出我哋嘅工作嘅。

政府係其實以實事求是嘅態度，係積極尋找土地嘅資源，進行科學嘅規劃，以確保本澳公共房屋能夠持續供應。喺致力保持公共房屋穩定嘅供應量，政府已經喺施政報告內提出咗，短期嘅 12,600 個公屋單位，係包括咗已經規劃嘅，亦都係包括咗 8,000 個單位係偉龍馬路嘅公屋項目。長期嘅規劃，喺新城 A 區預留公屋用地，提供 28,000 個公共房屋。我哋係好努力，係爭取明年 A 區嘅填海工程能夠完成。

喺呢度我要講一講，其實 A 區嘅填海工程，無論係特區政府，無論係總承建商，無論係廣東嘅省委、省政府，以至到中央嘅部委，亦都俾咗好大嘅支持我哋，亦都俾咗好大嘅關心我哋，去能夠完成呢個填海嘅工程。

呢個工程引起嘅延誤，主要係港珠澳大橋佢嘅興建裏面，喺技術上出現咗有佢嘅困難，而停止咗整個呢個地帶嘅供砂。呢個唔係我哋想像得到，亦都唔係我哋預計嘅。但係我哋好高興，特別係廣東省嘅政府，係全力協助我哋。最近亦都得到比較好嘅消息，羅立文司長嘅隊伍亦都係初步達成咗一個新嘅共識，係嚟到去恢復供砂。但係呢個唔係我哋預計得到，係因為呢個港珠澳大橋，佢嘅工程出現咗困難嘅時候停止咗供砂，呢個唔係政府，同埋亦都唔係總承建商可以預計。有時有一啲事情，唔可以預計發生咗而延誤，我哋亦都只能夠盡我哋最大嘅努力，去尋求解決嘅辦法。現在我哋係積極係尋求呢個解決辦法，係去完成返呢一個填海嘅工程，嚟到可以係按計劃嚟到興建 28,000 個公共房屋。

同樣，其他嘅建設，我哋依然係依照我哋嘅法律相關規定，喺行政程序好，喺司法程序好，我哋都係盡量爭取。整個羅立文司長嘅隊伍，其實已經將公屋係擺喺優先嘅次序。無論我哋係得到返嚟嘅土地好，擺優先次序。喺整個規劃過程中，亦都擺咗喺優先次序去做呢一個嘅工作。根據個法律嘅要求，當我哋能夠公佈嘅時候，我哋第一時間公佈。大家亦都好清楚，呢個社屋嘅法律，呢個經屋嘅法律。所以喺呢啲方面，我哋一定係會盡量係去做嘅。

關於呢個“澳人澳地”嘅問題，其實我哋喺 13 年，已經委託過兩間大學進行呢個相關研究。澳門大學嘅報告，對“澳人澳地”，係當時提出咗三種模式，一種係比 1993 年前嘅經屋制度更寬鬆嘅模式，而另外兩種模式，一種係較寬鬆，一種係較嚴格。都係類似現行經屋制度，都需要設定每次轉售對象係澳

門永久居民，認為較鬆散嘅模式，係震動小，易推行。理工嘅報告，對“澳人澳地”係提出咗保守、穩健同埋進取三種嘅策略，但係總嘅嚟講，個意見嘅分歧係比較大嘅。

所以喺“澳人澳地”方面，其實我哋亦都無一個係睇到喺兩極嘅反應裏面，去作一個決定。但係其實最重要係土地資源，先去解決咗公共房屋，基本上而家嘅要求，當我哋明年做好呢一個真正需求嘅量之後，我哋去解決咗。

而我哋亦都係展開咗研究關於新類別嘅房屋，呢一個我諗係關心到年青人。有議員亦都好關心，亦都關心到係澳門居民。但係最重要係土地資源。我哋已經係按照五年規劃，係做呢個土地儲備。我哋係好有信心，經過行政程序同埋司法程序，我哋係能夠有更多嘅土地資源。

如果主席允許，我想將呢兩個高等教育機構嘅報告交俾主席，大家睇對“澳人澳地”點解會有咁兩極嘅睇法呢？呢個亦都係要多聽議員嘅意見嘅。

多謝主席。

主席：多謝長官。

請關翠杏議員。

關翠杏：多謝主席。

長官閣下：

回歸之後為咗應對經濟嘅高速發展，政府喺人力資源政策上面，就只係著重咗解決量嘅問題，既無全面咁為本地人才嘅培養作出規劃，又無為唔同行業同埋專業訂定認證同埋註冊制度。大量嘅外勞輸入，明顯咁壓抑咗各行各業嘅工資嘅正常增長。除咗唔輸入外勞嘅博彩前線職位，同埋職業司機之外，唔少嘅行業，連技術人員嘅職位嘅薪酬亦都長期偏低。所以，入博彩業，考公職，就成為年輕人較單向嘅擇業選擇。再加上唔少企業當中嘅中高層管理職位，長期係由外勞出任，嚴重咁窒礙咗本地人才成長同發展嘅空間。勞動市場嘅結構被扭曲，要培養多元嘅新一代技術同埋專業人才，根本就變成咗空話。

面對住博彩業嘅深度調整，中央就提出咗多項嘅舉措去支持澳門未來嘅發展。特區政府要把握呢一啲政策同埋機遇，培

養儲備足夠嘅多元化本地人才係必不可少嘅。請問長官閣下，你有咩措施，改革而家呢啲咁粗獷型嘅人資政策，為澳門培養多元嘅專業同技術人才，以推動澳門經濟嘅可持續發展呢？

唔該。

主席：請行政長官閣下。

行政長官崔世安：多謝主席，多謝關翠杏議員嘅提問。

人力資源不足，一直係社會關注嘅問題，喺缺乏本地人才嘅情況下，引入資深有能力嘅技術人員，可解決燃眉之急，亦可以帶動本地人嘅迅速成長。政府已經推出多項政策，係提升本澳居民嘅職業技能同埋專業能力嘅。

喺提升居民嘅職業技能方面，推行呢個職業領域嘅師徒制度，鼓勵有能力擔任導師嘅人員，與新任職嘅人員，建立師徒關係。第二係以帶薪培訓，培訓結合考證同埋就業掛鉤等嘅模式，開辦呢個職業培訓課程嘅發展方向。第三係透過開設多項嘅培訓計劃，協助本地居民橫向或者向上流動。開辦各類應用人才嘅培訓課程。今年嘅上半年，勞工事務局係開辦咗 145 個職業培訓課程，係 6,427 人完成。喺 16/17 學年，十所學校亦開設咗 39 個職業技術教育嘅課程。

喺提升居民專業能力方面，係鼓勵居民進修或者考證。透過區域合作，協助居民考取澳門、內地同埋國際認可嘅職業技能證明或者資格。人才發展委員會嘅認照中心資訊平台，係提供咗 117 項專業嘅證照同埋國家職業資格技能嘅證照諮詢。第二係推行持續進修獎勵計劃。訂定納入獎勵範圍嘅專業證照考試，同埋職業培訓項目。第三係推出專才培養激勵計劃嘅框架。透過經濟嘅輔助，係鼓勵社會各界，係積極培養各類人才同埋專才。

政府係會不斷完善外僱嘅政策，堅持輸入外地僱員係補充本地人力資源不足。隨著澳門經濟喺過去兩年嘅深度調整，喺 15 年嘅 5 月至到 16 年嘅 9 月，外地僱員聘用許可嘅數字，根據我哋嘅統計，已經係由 21.4 萬，逐步減少到係 20.8 萬，減少約為 6,000 個名額。

我好明白剛才關議員所提嘅問題，我哋亦都會好重視，特別係呢個橫向同埋向上流動，係點樣提供到機會，係俾澳門嘅

居民。喺未來日子裏面，特別係管理階層，中高層管理階層，以及一系列透過同社團合作嘅培訓計劃等等，我哋都希望澳門嘅居民，除咗係有呢個接受教育嘅機會，亦都係有培訓、再培訓嘅機會。呢個方面我哋係會堅持，我哋亦都明白到，喺呢個深度調整之後，係一個好嘅機會讓澳門嘅居民橫向嘅流動好，同埋向上嘅流動好，呢個當然亦都要大嘅企業合作，俾機會嚟到……但係根據梁維特司長同我，大家工作同埋分析，我哋喺本地，特別係博企，依然係俾到好大嘅支持嘅數目。特別係中高層嘅管理，我哋亦都明確過，係去到大概 85% 係本地人出任。所以喺未來，我哋除咗係要有呢個就業，亦都係希望橫向同埋向上。

經濟適度多元，亦都係其實提供多元就業嘅機會。我哋亦都希望，唔係單一嘅某一個行業，能夠有機會橫向，係喺其他行業接受培訓之後，係能夠有新嘅工作。所以未來一系列嘅工作，我哋將會進行。我哋亦都好同意優先同埋係嚟到俾呢個本地居民提供佢培訓、再培訓嘅機會，橫向同埋向上嘅機會。

多謝主席。

主席：蕭志偉議員。

蕭志偉：多謝主席。

尊敬嘅行政長官閣下：

教育一直係各個地區嘅百年大計，影響著各個地區喺全球嘅競爭力，甚至對社會同埋經濟嘅長遠發展，都起著唔可估量嘅推動作用。

特區政府在澳門五年規劃嘅文本中，提出咗“教育興澳，人才建澳”，本人係非常贊同以及支持，將教育作為澳門未來發展嘅重中之重。但反觀目前澳門嘅非高等教育，普遍係以應試教育為主，社會一直有培養考試型人才嘅說法。而閣下在去年，青年就業及創業分享會上曾經表示過，多元選擇以及探索新教學模式，係未來必然之路。

確實，現代化嘅教育除咗培養學生係有優異嘅學習成績之外，更應革新教育嘅模式，進行創新式嘅教育，培養具有全面素質嘅未來人才，最終係配合到澳門經濟適度多元嘅發展需求。請問行政長官，政府未來如何將傳統嘅教育同創新教育合理結合，推出有效嘅機制，以逐步建立現代化嘅教育體系？亦

都通過一啲具體嘅措施，讓青少年能夠在合理嘅環境下學習、成長、同埋發揮潛能。

多謝。

主席：請行政長官閣下。

行政長官崔世安：多謝主席，多謝蕭志偉議員。

蕭議員今日問咗個問題，係我諗好多家長同埋澳門嘅朋友都好關心嘅。大家談咗好耐，但係又唔知應該點做嘅，一個真係老嘅問題。

應試教育嘅制度，我覺得有利亦有弊。一方面能夠保證咗學生全面接受基礎知識，以及創造咗公平競爭嘅環境。但係另一方面，又存在於片面重視於考試，重視於學生嘅課業負擔，局限咗學生創造力嘅發展等缺點。

但係我哋好高興睇到，我哋澳門教育亦取得一定嘅成績。根據國際學生能力評估計劃，我哋稱為 PISA 嘅，喺 03 年至到現在，澳門係全球高教育質量且兼備教育公平嘅八個教育系統之一，學生獲取嘅利用資訊嘅了解能力，係喺 44 個參與國家中同埋地區係排行第四嘅。

政府亦都意識到要有創新嘅教育模式先能夠迎合到發展，所以喺五年規劃，我哋提出咗，大力構建現代化、國際化嘅教育體系，持續創新教育思維，優化教育資源，提高教育質量，以教育嘅公平奠定社會公平嘅基礎。

我諗其實大家都會好體現到一個問題就係，現在澳門嘅非高等教育，整一套就係剛才蕭議員所提到，大部份都係應試嘅教育。所以我哋嘅同學，係有好重嘅壓力又好，學校嘅要求又好，而家根據我哋嘅了解，其實由早上上課，到下午下課之後，好大部份都要去補習社。補習社亦都好多時包埋晚餐，到好夜先至接呢啲小朋友返屋企。

但係大家都認同嘅，考試其實我覺得係三個競爭層面嘅。良性嘅競爭，可以講學校與學校必然存在一種良性嘅，大家都想教出好成績，好同學。第二個家長嘅競爭，亦都係好希望自己嘅兒女成績好。第三就到學生，亦都係有良性嘅競爭。但係喺應試教育裏面，係好難脫離到呢種競爭嘅，因為佢事實係創造咗一種公平競爭嘅環境。

但係又想一想，K1，K2，K3 之後，進入一年班一路讀到中六畢業，我哋簡單講，咁多年咁樣由細到大去競爭，咁又可能真係太辛苦，所以真係創新嘅思維，可能係有需要嘅，特別係喺教育方面。但係呢個已經形成咗咁耐嘅系統，無論係政府好，社會好，家長好，學校好，以至到學生好，點樣能夠轉變去接受一個新嘅系統，我認真係一個好大嘅課題。我哋大家都知道，佢有優點亦有不足，但係呢個不足，對呢個小朋友嘅成長可能影響好大，但係我哋又好似無咩其他辦法，因為良性競爭係存在嘅。

我自己亦從事教育界好多年工作。我哋過去，大家都好怕一樣嘢，就係呢啲國際評核，或者擺晒我哋去評核之後，我哋最希望就係唔好公佈。因為澳門過去大家亦都好明白，既無統考，亦都無咩聯考，所以大家喺自己嘅工作範圍內，做好自己嘅工作。呢個係好正常嘅，真係怕比拼。譬如如果你國際評核之後全部公佈嘅，其實我哋理解深一啲，好多國際嘅評核，其實唔係比高低，係比一個機會你，去進步嘅空間，點樣完善。但係我哋就好多時就好擔心，因為澳門長期嘅教育系統都係喺自己管理嘅教育機構裏面，係做好自己嘅工作，呢個亦都唔可以唔係對返我哋嘅前輩係要有感恩嘅。因為澳門喺八十年代之之前，基本上係社團、教會嘅學校，支持咗整個教育嘅基建，我可以講。係到八十年代之後，政府係開始去支持土地，資源增加。當時以一種有教無類嘅精神，其實教育界嘅前輩係付出咗好大。

但係與時俱進到而家，好多係需要國際嘅評核，需要好多嘅考試評核等等，大家都可能需要有一個思想嘅轉變，去接受呢啲新嘅事物。但係喺我自己嘅工作過程中，其實大家都比較有一個保守嘅概念，係做好自己嘅工作。所以而家喺呢個應試教育方面，引入好多國際嘅評核，已經係比過去以前，係誇進咗一大步。喺誇進呢一個大步裏面，下一步係咪大家社會共同去諗一諗，我哋呢個應試嘅制度，係咪有若干程度上要改變呢？

我諗係蕭議員提得好好嘅，但係呢個唔係單係政府嘅力量。因為大家睇到，非高等教育嘅機構，其實政府佔嘅比例唔多嘅。澳門長期以嚟，係真係佔嘅比例唔多，要有一個共識，點樣能夠令到啲同學又無咁辛苦，又發揮到潛能，呢個真係係一個好好嘅課題，值得我哋去研究。

多謝主席。

主席：何潤生議員。

何潤生：多謝主席。

行政長官閣下、各位官員、各位同事：

計萬九後嘅公屋嘅項目之後，喺 2014 年初，政府又提出，將推出有四千個公屋嘅單位應市。但係相關嘅土地同埋單位嘅數量不斷咁樣變更，一時又話有五幅地有四千個單位，一時又話七幅地有四千幾個單位。當局喺去年十月，就落實就係六幅地，有四千四百個單位，但係其後又修正為七幅，有四千六百個單位。上述嘅公屋嘅規劃，係講足兩年，卻一直係只聞樓梯響。

如今，喺明年嘅施政報告裏面，長官又再提出有四千六百個公屋嘅單位嘅規劃。為此，可唔可以請長官閣下，為居民去詳細咁樣解說相關短期嘅公屋嘅規劃嘅情況？因為有啲嘅用地，亦都涉及唔同嘅狀況，有啲都係政府部門，而家仲喺度辦緊工，個搬遷計劃係點樣呢？另外相關嘅公屋嘅項目嘅規劃嘅情況係點樣？有無具體嘅落實嘅時間表呢？

近期，亦都本澳嘅樓價，再逞上漲嘅趨勢。加上人民幣係持續咁樣貶值，內地亦都多個嘅省市，亦都出台咗樓市嘅調控措施。因此，香港已經係率先加辣。重點係壓抑呢個投資需求，同時亦都保障本地居民以自住為主嘅一個房屋嘅需求。鑒於施政報告對房地產市場嘅調控，平穩樓市方面著墨唔多，因此，想請問長官閣下，特區政府對此有啲咩睇法？會否適時加辣，落開防洪，抑制外來嘅資金嘅炒賣，避免樓市嘅泡沫化，重點咁樣去保障本澳居民嘅住屋嘅權益？

多謝。

主席：請行政長官閣下。

行政長官崔世安：多謝主席，多謝何潤生議員。

我諗剛才我亦都係先後答咗有關公屋嘅問題。

我諗重申一下，其實我哋係，特別喺羅司長嘅範圍裏面，範疇裏面，我哋係擺公共房屋喺一個好優先同埋重視嘅次序裏面。但係由於好多嘅行政程序，同埋司法程序我哋進行，係所以我諗有時啲個時間嘅控制，係要我哋能夠去到公佈

嘅時候，我哋先至可以公佈。我諗呢個我會同羅司長商量一下。我哋再嚟羅司長嚟嘅時候，同大家再介紹一下。但係嚟施政報告裏面，亦都係明確咗我哋係三方面嘅工作。一方面我哋係，列出咗我哋預計嘅公屋計劃，短中長期，亦都係有呢個研究，係包括咗嗰個需求量，同埋另類房屋，亦都係有呢個需要修改嘅法例，法律嘅制度。

剛才談到加辣嘅問題，我諗呢個如果係市場上出現咗呢個不正常嘅情況，係亦都需要我哋嚟調控嘅，其實我哋係同過往一樣嘅。我哋係，本人、梁維特司長同埋羅立文司長，同過往一樣，我哋有個機制，係有我哋屬下部門，同埋研究嘅機構，係監察住呢個樓市同埋金融嘅情況。辣招就唔講得嘅，一出就出。同埋，亦都係無可能即係，我諗係我哋照過往嘅做法一樣，我哋一定係要保護市場嘅穩定，金融嘅穩定，同埋係睇呢個地產市場健康發展。如果佢偏離咗嘅時候，我哋一定會出手，去平穩呢個樓市。

過去，我哋所出嘅招數，亦都無減到，但係係咪真係係呢個階段，就要出一啲更加高呢？其實大家都好明白，係幾方面嘅，呢個貸款嘅比例，稅收，呢啲幾個方面，同埋呢個首期嘅比例等等。其實我哋有一啲可以即刻做，有啲係通過要修改法律做。但係如果係我哋做嘅話，我哋必定係需要得到呢個支持嘅，用緊急嘅程序去處理，但係我哋會密切關注住嘅。

多謝。

主席：高天賜議員。

José Maria Pereira Coutinho: Obrigado Sr. Presidente!

Sr. Chefe do Executivo e Srs. Membros do Governo.

Sr. Chefe do Executivo, em Novembro de 2009, 7 anos atrás, e aquando da apresentação das LAG para 2010 para a Área da Administração e Justiça, perguntei à ex-Secretária para a Administração e Justiça quando procederia à modernização da legislação sobre o regime das despesas com obras e aquisição de serviços, Decreto-Lei n.º 122/84 de 15 de Dezembro, ou seja um diploma que vigorava a mais de vinte e seis anos, hoje mais de três décadas.

Na altura, o Governo desinteressou-se pelo assunto e

preferiu “tapar o sol com a peneira” (vide minha interpelação de 16/02/2011 e a resposta do Ex-Director dos SAEP de 25/03/2011).

Em Janeiro e Outubro do corrente ano os Comissariados de Auditoria e de Contra a Corrupção apresentaram respectivamente os seus relatórios respeitante ao cumprimento do Decreto-Lei n.º 122/84 de 15 de Dezembro e a legislação pertinente, criticando alguns serviços públicos, entre outras críticas, a interpretação errada das normas legais e o uso abusivo de circunstâncias especiais previstas no diploma legal para subtraírem aos procedimentos legais, violando o princípio da legalidade e abusando sucessivamente dos poderes públicos. Veja por exemplo o Ex-Procurador acusado de milhares de crimes quase que praticava em média três crimes por dia!

Assim, pergunto:

Que responsabilidades políticas têm as entidades tutelares dos serviços públicos na dependência hierárquica de Vossa Excelência, face aos sucessivos escândalos que foram detectados pelo Comissariado de Auditoria e de Corrupção, nos termos do n.º 1 do artigo 9.º das Normas de Conduta dos Titulares dos Principais Cargos da RAEM e publicado pela Ordem Executiva n.º 112/2010 de 21 de Dezembro destinado a evitar a prática de actos que violam a lei e o abuso de poderes públicos?

Muito obrigado!

(**高天賜：**多謝主席。

行政長官、各位官員：

七年前，即 2009 年 11 月，亦即引介 2010 年行政法務領域施政方針時，本人曾就何時才會對 12 月 5 日第 122/84/M 號法令《有關工程、取得財貨及勞務之開支制度》，一個當時已生效超過 26 年，而到現在已超過 30 年的法令進行法律現代化，向時任的行政法務司司長作出提問。

政府當時沒有理會這件事，只選擇以自欺欺人的方式作出回應——可查閱前公職局局長於 2011 年 3 月 25 日針對本人 2011 年 2 月 16 日書面質詢而作出的回覆。

審計署和廉政公署分別於本年 1 月和 10 月，針對 12 月 5 日第 122/84/M 號法令和其他重要法律的遵守情況，編製了相關的報告書，批評有些部門在“法例理解上存在偏差，濫用特殊做法，迴避正常程序，違反合法性原則和不斷濫用公權力”。例如前檢察長被控上千宗罪行，幾乎每日平均三宗。

請問長官閣下：

按照專為預防違法行為和公權力被濫用而頒佈的十二月二十一日第 112/2010 號行政命令核准的《澳門特別行政區主要官員守則》第九條第一款規定，針對審計署和廉政公署接連揭發的醜聞，作為有關部門監督實體的司長，即長官閣下的下屬，到底需要負起甚麼政治責任？）

主席：請行政長官閣下。

行政長官崔世安：多謝主席，多謝高天賜議員嘅提問。

122/84/M 號法令，係《有關工程、取得財貨及勞務之開支制度》，係事實上實施咗一段好長嘅時間，係有必要作出適當嘅檢討嘅。相關部門其實已經開展咗修法嘅工作，現正就先行公務採購嘅法例進行全面嘅檢討同埋研究，爭取喺明年展開有關法案嘅草擬同埋諮詢嘅相關工作。

對於審計同埋廉政公署指出嘅問題，特區政府係非常重視，並已經採取咗下列嘅措施：

第一：令相關公共部門係吸收教訓，同時係避免同類嘅情況再一次發生。

第二：嚴格執法，強化內部嘅監督。各個部門必須嚴格按照《公務採購制度》及遵循廉政公署所發出嘅指引，係嚟到跟進。

第三：強化培訓，加強各個部門工作人員嘅廉潔奉公，知法守法嘅意識同埋責任意識。

第四：現在剛才所談及嘅，係加快公務採購法律嘅修法工作。

特區政府一直強調依法施政，一旦發現違法違規嘅情況，喺查清客觀事實嘅前提下，係一定會追究呢個責任嘅，包

括咗行政嘅責任同埋刑事嘅責任。至於你提出到監督實體嘅責任問題，我認為係應該區別對待。凡係無盡到監督職責，確有過失嘅，係應該負責任嘅。但係監督實體是否有過失呢？係應該根據有關法律規章，嚟到去進行分析明確。

此外，監督實體如果無疏忽去履行職責，屬下嘅部門執行過程中依然有問題，就需要具體去分析，喺依法客觀公正嘅原則下予以明確。呢個本質上依然係一個法律嘅責任，係應該要負責嘅。

多謝主席。

主席：崔世平議員。

崔世平：多謝主席。

行政長官閣下：

政府喺五年嘅規劃之中，提出咗建設智慧城市嘅概念。數據應用其實就係智慧城市建設嘅關鍵。馬雲先生最近亦都講，數據係新嘅能源，佢越用就越好。佢嘅重要性、普及性、同埋共享性係無庸置疑嘅。

與此同時，其實個人私隱喺而家呢個社會裏面，亦都越嚟越受重視。私隱觀念嘅法律定位同埋執行準則，將會對數據嘅收集、輪傳、儲存以及應用，可以起到決定性嘅作用。

想請問行政長官閣下，究竟喺發展呢個智慧城市，同埋合適保護個人私隱兩者方面，政府會有咩嘅取態，先可以確保兩者都可以一齊邁步向前？

多謝。

主席：請行政長官閣下。

行政長官崔世安：多謝主席，多謝崔世平議員嘅發問。

智慧城市嘅建設，同保障私隱嘅政策取態，特區政府係重視對個人資料嘅保障，喺 8/2005 號嘅法律《個人資料保護法》，係針對個人資料處理，訂定咗一套基礎嘅原則，同埋一套係規範嘅。同時，個人資料保護辦公室係依法履行職責，針對唔同嘅領域，亦制訂咗指引，向社會宣傳個人資料保護嘅意識

同理方法。

特區五年發展規劃裏面，將建設智慧城市，作為未來遠景同理目標之一。智慧城市建設中，我諗無可避免地，係涉及到個人嘅資料問題，亦都會引起社會嘅關注。我哋應該堅持，數據係開放共享嘅理念，同時亦都要重視個人嘅私隱保護，係喺兩者之間係取得一個平衡。智慧城市收集到嘅數據，並不一定全部係與個人私隱有關。如果涉及到個人私隱方面，特區政府嘅態度一如既往，係嚴格按照法律進行保護。

智慧城市嘅概念發展，同理大數據嘅應用，必然係為個人資料嘅保護，係會帶嚟一定嘅風險。未來係需要喺相關工作進行評價、預測，對可能嘅風險，從技術上、制度上、法律上，係予以防範。我哋參考唔少先進國家地區，已經對資料嘅匿名化同理去識別化，係建立相關制度。特區政府喺呢方面亦開展相關嘅研究。另外，政府亦會係特別針對個人資料被非法搜集、泄露、濫用嘅情況，係加強法律嘅力度，同理懲罰嘅力度。

隨著法律制度嘅完善，以及市民對私隱保護意識嘅提高，相信發展智慧城市與保護個人資料兩者之間，係能夠取得平衡。我相信發展智慧城市呢個係而家必然之路，但係個人嘅私隱，係受到法律嘅保障。點樣能夠做好呢個平衡呢？係將來我哋除咗需要研究，亦係需要做嘅工作。但係而家睇嚟，整個社會嘅發展，係好重視呢個智慧城市，亦都要與時俱進，去符合佢嘅發展所需。

特區政府係會根據五年規劃，全力以赴，做好呢個工作。亦都會重視到保護呢個私隱。係點樣尋求呢個平衡，參考好多先進嘅國家地區，啲匿名化，呢啲去識別化等等嘅相關工作嚟到去配合。

多謝主席。

主席：梁榮仔議員。

梁榮仔：多謝主席。

長官閣下：

澳門特別行政區政府成立後，《基本法》第九十八條，係有保障原在澳門任職嘅公務人員，包括警務人員、司法輔助人員

均可留用，其薪金、津貼、福利待遇不低於原來嘅標準。原來享有嘅年資給予保留，以及澳門特別行政區向他們或其家屬支付不低於原來嘅標準應得嘅退休金同理撫恤金。

而特區政府多年前施政方針中，均強調公務員是特區政府嘅重要寶貴人力資源，只可惜特區政府於 2007 年，取消咗我哋公務人員嘅退休金制度，改為公積金制度。但政府又不公平地只保留法院及檢察院司法官員享有退休金制度，呢一度可能係抵觸《基本法》第二十五條。而行政合同嘅公務人員，年資由 2007 年才開始計算，以前工作嘅年資一律不計算在內。

回歸後特區政府也沒有興建過一間政府宿舍給予公務員申請，所以公務員現時福利待遇，實質上係低於回歸前。尤其是係保安部隊廿四小時長期輪值及不規則嘅作息時間工作，包括治安警察、海關關員、司法警員、消防員、懲教管理局警員，儘管這些前線警員默默貢獻多年，並為本澳市民提供優質嘅服務，但卻未能得到相對退休保障及政府房屋待遇支援，對他們係非常之不公平嘅。

為確保保安部隊人員資源被有效利用，行政長官閣下，會否考慮保安部隊人員制度，包括恢復退休制度，十年補兩年制度，為公務員興建宿舍等措施？以及加快考慮，工作滿二十年或二十五年公務員申請提前退休嘅研究可能性？這樣才能體現特區政府對公務人員嘅重視同理關懷。

多謝。

主席：請行政長官閣下。

行政長官崔世安：多謝主席，多謝梁榮仔議員嘅問題。

政府一直係重視保安部隊嘅穩定同理發展。喺回歸以來，多次係調升整體公務人員嘅薪酬同理津貼。亦都因應職務嘅特性，改善咗保安部隊人員嘅待遇。將保安部隊嘅基礎職程，入職薪俸點由 180 點係調升至 260 點。增補性嘅報酬亦由 50 點提升到 100 點。又調整咗特殊職位人員嘅特殊津貼、膳食津貼等。

現在係正展開咗呢個《澳門保安部隊軍事化人員通則》嘅修訂工作，包括建議新增高級警長、高級消防區長嘅職位，令到基礎職程人員係有機會晉升，激勵人員嘅積極工作，同理提升佢哋嘅專業能力係向上流動。

關於恢復退休金制度嘅問題，係 8/2006 號法律頒佈後，自 2007 年起入職嘅公務員，係包括保安部隊嘅人員，係只可以加入公積金制度。呢個係根據廣泛諮詢，同埋經過立法會通過嘅法律制度所作出嘅安排。當然，呢個係唔影響 07 年前已經入職，編制內公務員享有嘅福利待遇。

關於十年補兩年，工作滿二十年或二十五年申請提早退休嘅問題，保安部隊嘅人員，每十年加兩年嘅年資補償制度，其實係 1990 年係已經取消。考慮到保安部隊人員工作嘅特殊性，係特別設立咗長期服務獎金。如果係因為在職意外，亦選擇退休金代替公積金。長期服務獎金係指呢個 8/2006 號法律裏面，公務人員公積金制度中，專為保安部隊軍事化人員、刑事偵查員、助理刑事偵查員、監獄嘅監管人員，同埋海關嘅關員所設嘅長期服務金嘅。

關於呢個，政府係會綜合考慮公積制度嘅改革工作，全面係會檢視公務人員嘅福利問題，研究有關建議嘅可行性方案。呢個當然要視乎政府嘅條件。如果許可，我哋係好樂意進行全面係呢個檢討嘅。

關於呢個公務員宿舍問題，保安部隊同埋部門人員嘅宿舍，係涉及咗呢個福利房屋，亦須納入喺政府公共房屋整體嘅規劃。政府盡可能提供更多嘅住宅單位，係俾公務人員去競投租賃。今年接受公務員申請公開競投租賃嘅，係有 110 間政府房屋。保安部隊人員在內嘅編制內公務員皆可以申請，預計 17 年完成呢個分配嘅名額。

雖然目前政府嘅房屋資源有限，係未能夠滿足所需，但係綜合結合呢個土地嘅資源，房屋嘅政策，政府係會考慮係相關提出嘅建議同埋政策。

多謝主席。

主席：高開賢議員。

高開賢：多謝主席。

行政長官閣下：

勞資關係和諧係有利社會嘅發展。政府致力維護保障增加勞工嘅權益，確保本地居民就業，提升居民嘅生活素質。但係近年，失業率係長時間咁維持喺百分之 1.7 至 1.9。本地居民工

作收入嘅中位數係一萬八千。喺全民就業嘅大環境底下，工商界則受到種種勞動政策嘅壓力，好似《勞動關係法》，《外僱法》，最低工資，增加社保嘅供款，央積金，人資不足，尤其係司機嘅嚴重不足等等。營商嘅環境係不斷咁惡化，中小微企嘅成本亦都唔斷增加，導致社會嘅通脹唔斷加劇，對社會係造成深層次嘅影響。

而資方所需要嘅係良好嘅投資環境同埋營商環境，所考慮嘅亦都並非純粹係商界嘅利益，著眼點係社會整體利益。想請問行政長官閣下，對商界認為政府制訂政策傾斜於勞方，而且對經濟發展係帶嚟不利嘅影響有啲咩睇法呢？點樣能夠解決目前中小微企所面對上述嘅各種困難，制訂相關嘅政策，讓本澳嘅各業能夠可持續發展呢？

多謝。

主席：請行政長官閣下。

行政長官崔世安：多謝主席，多謝高開賢議員嘅提問。

特區政府係一直致力於創造良好嘅投資環境同埋營商環境，其中喺促進勞資關係能夠更協調、穩定，亦係政府職責所在。政府推出任何嘅政策，一貫立場係建基於係整體社會嘅利益，充分考慮勞資雙方嘅意見同埋訴求。

勞資雙方嘅命運，係命運嘅共同體，其實需要彼此相輔相成，共同維護社會嘅和諧同埋穩定。喺市場嘅經濟中，勞資雙方嘅關係唔係對立嘅，零和博弈，而係一榮俱榮，一損俱損。切實保障勞方嘅權益，有助提高員工嘅士氣，留住優秀嘅員工，相信亦係資方嘅目標之一，更符合呢個長遠發展嘅利益。

喺過去呢兩年，澳門處於一個經濟深度嘅調整期，但係能夠維持到呢個失業率喺百分之二以下，我哋係睇到商界係付出咗好大嘅努力，呢個亦都係維繫到係整個社會嚟到係有一個良好嘅環境嘅。呢一方面，係覺得我哋係資方方面，係做出咗好大嘅貢獻。

特區政府喺制訂任何勞動政策過程中，係一貫重視社會協調常設委員會嘅角色同埋作用。作為一個諮詢性嘅組織，社協嘅目的係為咗僱主同埋僱員，提供有效嘅溝通平台，讓雙方面可以就特區政府制訂嘅社會勞動政策，有關勞工事務問題發表

意見、對話，尋求共識。

剛才提到嘅中小企，我哋係非常之重視。因為中小企係澳門係一個好重要嘅組成部份，亦係發揮好重要嘅整個社會嘅作用。喺未來一段時間，除咗鞏固我哋支持中小企嘅政策措施外，我諗能夠亦都係想方設法，希望加大個力度去支持。呢個包括咗輸入嘅人才，包括咗政府嘅多點支撐。亦都包括咗我哋希望能夠喺呢個無論培訓好，無論喺政府嘅措施方面好，都係希望能夠加大力度去支持，嚟到提高呢個營商嘅環境。

因為喺過去嘅二十多個月嘅深度調整，俾到一個好好嘅機會澳門，係重新係檢視我哋整個地區嘅發展。從中央嘅明確指示定位，大家都知道，係世界旅遊休閒中心，同埋中國對葡語系國家嘅商貿服務平台，兩方面都希望加強。更加係希望我哋能夠係發展呢個區域嘅合作，嚟到係達到可持續發展。

而喺呢個裏面，其中一個最重要之一嘅重點，就係要一定支持好澳門嘅傳統同埋中小企業。喺呢方面，我同梁維特司長亦都係多次商量，想方設法。特別喺我哋任期嘅未來三年，我哋會制訂一系列嘅措施，包括咗區域經濟嘅合作。目前我哋係非常之係有呢個發展嘅前景嘅。三大嘅區域合作，泛珠三角嘅區域合作，長三角我哋現在發展呢個“澳蘇合作園區”。我哋亦都係發展緊同北京同埋天津嘅合作。所以呢個京津冀區，所以三大嘅區域合作，我哋都係發展，亦都係希望能夠係俾到我哋澳門中小企業係有發展嘅機會。

今日談到嘅傾斜政策，特別係我哋喺施政報告裏面所陳述嘅，亦都係希望能夠讓澳門嘅中小企係加入嘅。喺《粵澳合作框架協議》嘅下面，我哋亦都係喺呢個幾個片區，我哋亦都係希望能夠中小企，係喺政府嘅支持下，係去加入。亦都係關心到近期我哋除咗橫琴，我哋去到呢個中山、江門等地嘅合作，都係希望係支持到澳門嘅中小企，一個能夠參與區域經濟嘅合作，得到發展一個亦都係本地創造更好嘅條件嘅。我相信喺未來嘅三年，我哋係會全力係支持好本澳嘅中小企業嘅發展。一方面希望能夠有更多嘅發展機會，一方面亦都係保存著現在係經營嘅營商環境，足以支持佢哋嘅發展。

多謝主席。

主席：多謝長官。

各位議員：

現在休息半小時。

(休會)

主席：各位議員：

會議繼續。

請鄭志強議員。

鄭志強：多謝主席。

行政長官閣下、各位官員、各位同事：

下午好。

行政長官閣下，國家“十三·五”規劃中特別提到，要提升特區國家經濟發展，同埋對外開放中嘅地位同功能。呢個無疑係國家俾特區國家發展中嘅一個定位。點樣用呢個政策，點樣把握住內地經濟嘅發展同埋對外開放嘅大好機遇，加快澳門經濟適度多元發展，呢個係全澳市民，特別係澳門工商各業所期盼嘅。

請問行政長官閣下，未來三年，特別係明年，點樣切實用好國家“十三·五”規劃中，俾特區國家發展中嘅定位呢個大好政策呢？

多謝。

主席：請行政長官閣下。

行政長官崔世安：多謝主席，多謝鄭志強議員嘅提問。

“十三·五”規劃係明確咗澳門係國家發展大局中嘅特殊地位嘅作用，第一係提升港澳係國家經濟發展同埋對外開放中嘅地位同埋功能；第二係支持澳門“一個中心，一個平台”，積極發展會展商貿等產業，促進經濟適度多元同埋可持續發展；第三係支持澳門參與國家雙向開放“一帶一路”嘅建設。

國家嘅發展係澳門特別行政區最堅強嘅後盾，亦係俾到好嘅機遇。透過發揮澳門自身獨特嘅優勢，助力國家嘅發

展。透過主動對接國家發展戰略，突破自身限制，對經濟結構進行調整，同埋加強呢個區域合作。喺五年規劃對接國家“十三·五”規劃，投入“一帶一路”嘅建設方面，澳門特區五年規劃，係設有專章，落實同國家嘅“十三·五”規劃對接，把參與國家“一帶一路”建設確定為特區發展戰略。中央係重視同埋支持澳門特別行政區參與同埋助力“一帶一路”嘅建設。

喺支持嘅舉措，係有五個方面嘅領域嘅：第一，圍繞金融服務，拓寬合作領域；第二係發揮專業嘅優勢，輸出高端服務；第三係發揮區位優勢，推動經貿交流；第四係聚焦人民嘅交流，促進民心相通；第五係深化區域合作，發揮協同效應。

重點支持嘅措施，係包括有：澳門依托人民幣清算，拓展與葡語國家間嘅人民幣業務往來同埋清算服務；二係以適當方式，我哋係參與阿投行同埋思路基金嘅財資平台；第三係協助澳門發展特色金融，開展融資租賃產業嘅研究同埋規劃工作；第四係促進“一個中心，一個平台”嘅建設，與“一帶一路”係有機結合。

已經設立咗由行政長官辦公室牽頭嘅專門工作委員會，統籌本澳參加“一帶一路”嘅工作。李克強總理來澳視察嘅時候，係宣佈咗十八項，促進中葡經貿合作嘅舉措，以及十九項嘅惠澳措施。充分體現咗中央對澳門嘅關心同埋支持，有利於澳門融入國家發展嘅大戰略，加快推進經濟適度多元，鞏固同埋提升澳門嘅競爭力同埋國際地位。

澳門特區將會積極配合“十三·五”規劃，用好國家為澳嘅政策，深化區域合作，融入國家未來嘅發展。

多謝主席。

主席：多謝長官。

陳虹議員。

陳虹：多謝主席。

行政長官閣下：

本澳青少年學生嘅體質狀況，一直被受社會嘅關注。今年七月公佈嘅“2015年澳門市民體質監察報告”顯示，學生課

外，成年人以及老年人經常參加體育鍛煉嘅人數同比增加，反映近年嚟市民重視體育鍛煉。市民持續及恆常嘅運動習慣意識係增強咗。長官喺施政報告提出，要建設健康澳門，本人係十分認同嘅。

隨著澳門人口嘅增加，居民健康嘅意識係增強，對體育活動空間同埋設施嘅需求，將越嚟係越大嘅。但係，本澳體育場地及活動空間係不足，空間分佈不均等問題十分突出，社會對增加體育用地有強烈嘅訴求。希望政府能夠利用填海造地、閒置土地，興建更多嘅體育運動場地同埋設施。並且優化社區體育設施，以便居民、學校、學生有足夠嘅空間進行體育鍛煉，增強體質。

請問長官閣下，喺增加澳門公共體育設施，特別係增加青少年活動空間方面，有乜嘢具體嘅規劃？喺完善社區體育設施方面，政府有乜嘢具體嘅計劃？逸園賽狗場使用權即將到期，對於有意見認為，政府應利用原址，興建大型嘅運動綜合體，政府對呢一個有乜嘢具體嘅構想？

唔該。

主席：請行政長官閣下。

行政長官崔世安：多謝主席，多謝陳虹議員嘅提問。

政府向來係重視體育事業嘅發展，為咗居民提供更多體育空間同埋設施，係創造更多參與體育鍛煉嘅機會，嚟到提升身體嘅素質。

2005年起，與國內同步，係實施五年一度嘅“市民體質監察計劃”。2015年，澳門嘅市民體質嘅總體水平，係比起2010，係有較大概嘅提高，尤其係幼兒、青少年學生、成年人。而戶外嘅體力活動，體育鍛煉嘅程度亦提高。

特區政府喺2006年，係推出咗公共體育設施網絡，明白係將會進行全面嘅檢討。近年不斷完善同埋優化公共體育嘅空間，為居民係提供更多嘅體育場所同埋設施。公體網推出嘅時候，係有24個體育設施，經過十年發展，係已經有45個體育設施俾市民同埋團體係租借，使用嘅人次亦都係上升。今年截至10月31日，係有5,252,169人次，較2015年同期係增加咗百分之三十八嘅。我諗嚟明年進行全面檢討，亦都會係將呢一個實際嘅需要，同埋我哋點樣能夠預留更多嘅體育設施空

間，嚟到去建造呢啲新嘅體育場地。新城嘅填海規劃，亦都包括咗係有預留足夠嘅體育設施空間嘅。而綜合性嘅多功能模式規劃，興建新嘅體育場館，或者重建原有嘅體育場館，係包括有望廈，有興建運動員嘅培訓集訓中心，同埋下環街社會服務綜合大樓內設嘅體育設施等等嘅。

剛才所談及嘅就係呢個逸園賽狗場嘅遷出之後嘅用途。喺呢段期間，政府係收到多個團體同埋機構嘅建議嘅。有包括希望做體育嘅場所，而唔係做符合國際標準嘅比賽場所，而係運用嚟練習嘅場所；有建議興建社會嘅設施；有建議興建公共房屋；有建議興建學校；亦有建議興建服務一啲綜合中心，同埋將現有嘅功能能夠保存。因為現在整個區裏面，佢係有體育，亦都有服務，亦都有運動場，同埋呢個賽狗場。

政府經聽取意見同埋研究之後，會檢視該區人口對體育設施嘅需求同埋實際嘅情況，係作出呢個規劃。暫時就收咗好多唔同嘅意見，正如我剛才講，有唔係國際比賽嘅場地，係專為練習嘅場地，俾唔同嘅學校機構用；有建學校；有建社會設施；有建公屋；亦有建服務中心等等嘅。我哋會落實去研究。

多謝你。

主席：黃潔貞議員。

黃潔貞：多謝主席。

行政長官閣下、各位官員、各位同事：

政府喺教育領域上，要繼續貫徹教育興澳嘅指導方針，穩定同埋促進教師嘅發展，係非常之重要嘅一環。《私框》嘅實施，對穩定私立學校教學隊伍，起著重要嘅作用。但係有私校嘅老師反映，喺待遇同埋退休保障方面，仍然需要加強。

加上，《私立學校教學人員專業發展制度》嘅行政法規仍未出台，導致佢哋嘅培訓項目，缺乏系統性嘅規劃同埋鼓勵性。同樣，公校嘅老師面對著工作增加。公校方面存在著《教育暨青年司教學人員通則》嘅部份條文已經不合時宜，舊嘅制度未能配合新聘用合同嘅制度，以及《工作表現評核及專業發展活動》嘅法規仍未出台等問題。可見，本澳公私立學校嘅教師嘅士氣同埋專業發展，都受到一定嘅制約。

請問行政長官閣下，為著穩定同埋促進本澳教師隊伍嘅發

展，會否完善《私框》嘅制度，使到私校嘅教師，喺待遇上更加貼近公立學校，同埋強化佢哋嘅退休保障？而訂定《私立學校教學人員專業發展制度》嘅行政法規嘅進度又係如何呢？而喺訂定教師專業發展指引性嘅法規嘅同時，可唔可以研究，對修畢教育範疇嘅碩士、博士或者係專業性課程嘅在職教師，給予持續性嘅專業津貼，用實際嘅行動，去推動教師培訓？另外，針對公校嘅教育暨青年局嘅教學人員通則嘅草案，幾時先可以完成出台呢？

唔該。

主席：請行政長官閣下。

行政長官崔世安：多謝主席，多謝黃潔貞議員。

我嘗試逐個問題去解答。

教師係實施“教育興澳，人才建澳”嘅發展戰略重要力量，建設優秀嘅教師隊伍，係政府嘅責任，亦都係時代所需，亦係廣大市民嘅願望。政府係以制度建設，資源投入，從教師嘅職業尊重，專業發展嘅角度，維持教師隊伍嘅穩定，提升佢整體嘅水平，促進教育嘅長遠發展。要達到呢個目的，唔只需要政府嘅完善相關工作，係還需要教師個人嘅努力，家庭嘅協助，學校管理嘅配合，同埋社會嘅支持嘅。

喺非高等教育領域 2012 年實施嘅《非高等教育私立學校教學人員制度框架》裏面，係標誌著澳門私立學校教師制度嘅基本確立，對澳門非高等教育，係具有歷史性嘅意義。《私框》相關嘅制度安排，係有助提升教師嘅專業水平，建立專業嘅學校領導同埋管理團隊，規範合理嘅薪酬待遇，規定學校必須為教學人員設立公積金制度，加強私校教師退休嘅保障。同教育界保持密切嘅溝通，就《私框》中嘅評核、公積金、工作量計算等問題係聽取意見。由於呢個法律嘅實施時間唔長，需要完善配套機制，目前係未有全面修訂嘅安排嘅。

政府重視教學人員嘅專業發展，係有多項嘅措施給予支持。《私框》嘅十六條規定，取得碩士或博士學位，被視為有模範專業表現，並作為教學人員申請提前晉升嘅條件嘅。按照教師嘅職級、學歷、師範培訓嘅情況，向教學人員發放專業發展津貼，推動同埋支持教師持續提升專業水平。鼓勵私立學校在職教師參加休教進修，為期一年，脫產培訓不超過半年。教師喺進修期間，係享有政府發放嘅各項福利，亦都係每月包括專

業發展嘅津貼。

為咗教師能夠修讀教育課程及學位後師範培訓課程，係提供學費資助。資助嘅金額係學費嘅八成，上限係每一個學年二萬元澳門元。2015/16 學年，具備師範培訓資格嘅教師比例分別係幼兒教育係 99.1%，小學教育係 97.6，中學教育係 89.2 嘅。正係積極構思同埋草擬私立學校教學人員專業發展嘅法規嘅，預計喺 17 年聽取意見，18 年係進入呢個立法程序。

關於關心到嘅，政府已經係開展係對呢個《教育暨青年局教學人員通則》相關嘅修訂工作，係包括咗適度下調公立學校教師每週授課嘅時數，訂定公立學校教師工作表現評核嘅基本原則嘅。

我想補充幾點講。其實喺討論呢個教師方面，而家已經係進入咗一個新嘅時代。喺過去嘅時候，教師嘅收入事實係低於係一般嘅水平，係為咗教育而奉獻好大。當時係政府有一個津貼係特別為教師嘅。現在由於《私框》已經頒佈，同埋政府嘅支持，同埋學校嘅努力，其實教師嘅待遇，係比過往係獲得更好嘅條件。呢個包括咗薪酬福利，退休方面係有呢個公積金供款嘅制度，亦都係有呢個專業嘅培訓嘅津貼等等嘅。

但係，好坦白講，因為公立學校嘅老師，佢係公職制度，私立學校嘅老師係根據佢學校嘅制度，係所謂《私框》，所以佢兩者之間係事實存在係有距離嘅。但係而家嘅《私框》嘅規範下，私立學校嘅老師，其實所獲得嘅專業尊重、待遇、津貼等等，係比過去已經大大提升。我相信係有條件係俾到比過去更好，能夠去培養學生嘅。

所以喺呢啲方面，我哋依然會繼續去檢討。但係對於公立嘅老師嘅通則，係事實係需要修訂，亦都進入咗程序嘅。

多謝。

主席：徐偉坤議員。

徐偉坤：多謝主席。

尊敬嘅行政長官閣下：

雖然賭收有回穩嘅跡象，但環球經濟仍然存在不確定嘅因素。本澳稅收依然高度依賴博彩收入。量入為出嘅理財原

則，係特區政府嘅施政理念。長官你可否介紹一下明年財政預算制訂嘅情況同埋考量？尤其是喺一些大型項目，從立項嘅提出，到預算嘅公佈，都受到社會嘅質疑。長官如何評估目前嘅狀況同埋對此有咩睇法？

唔該。

主席：請行政長官閣下。

行政長官崔世安：多謝主席，多謝徐偉坤議員嘅發問。

政府編製財政預算案嘅時候，係堅持住《基本法》確定嘅量入為出原則，力求收支平衡。明年嘅預算，係以博彩毛收入全年二千億元嘅估算作為基礎，估計仍然係一份有盈餘嘅預算案。

為咗確保各部門正常運作及提供優質嘅公共服務，明年嘅公共部門開支預算，係有百分之 2.6 嘅輕微增長。而國際貨幣基金組織預測，澳門明年嘅經濟增長，係為正嘅百分之 0.2，通脹就係百分之 2.8。政府嘅資源優先係放喺民生福祉同埋基建嘅項目上面。明年嘅共用開支預算，將增加百分之 29.4，呢個涉及咗重大民生嘅必須開支以及區域合作嘅投入，亦都包括咗現金分享、公積金個人賬戶注資、住宅單位電費補貼、醫療卷、港珠澳大橋區域合作等，有助改善民生，促進特區與內地融合嘅發展。

澳門嘅經濟仍然處於深度嘅調整期。政府係有責任維持一定嘅公共投資。明年嘅投資計劃預算開支，係增幅達到百分之 37.8。藉著基建嘅建設，同埋公共投資嘅投放，係增加就業機會，同埋促進經濟發展，提高本地競爭力同埋經濟嘅活力。

政府係充分明白到，社會期望提高政府預算同埋喺大型公共工程資金使用嘅效率。經過我哋嘅研究同埋現在嘅流程，工程嘅預算通常係經過五個步驟進行。第一係收集各方數據以及使用者嘅要求；第二係按其實際進行設計，並得到政府相關部門以及用家嘅認可；第三係設計公司編製嘅工程數量清單；第四亦都係按照近期同類工程判給嘅平均造價考慮；第五係結合市場變化等因素，係計算出工程預算嘅金額。

喺呢度我諗徐議員好關心嘅問題，其實我都好關心嘅就係，往往預算一公佈，到真正投標得出嚟嘅數嘅預算數嘅差額。所以我哋係責成亦都指示部門係唔好草率地係將預算公

佈，係應該科學地、嚴謹地，係根據有關程序計算之後，先至好公佈預算。因為預算往往公佈之後，到真正嘅開支嘅時候，係遠遠高於預算，係俾到廣大市民一個非常唔好嘅印象，係呢個預算嘅差距太遠。所以近期我哋進行一系列嘅內部研究，係希望盡量係公佈出嚟嘅預算，係經過剛才所提出嘅步驟，同埋確實係能夠係接近呢一個同類工程近期嘅造價嚟到去做一定嘅基礎。

因為如果唔係嘅話，往往就好似喺過去發生咗好多超支。當然，喺唔同嘅國家地區，我哋都發現好多大型嘅工程，有好多不可預計嘅情況出現，係時間長咗，預算數增加咗。但係我哋希望係能夠盡量預防同埋避免呢啲情況出現，所以喺預算嘅過程中，係增加呢個嚴謹同埋科學嘅計算。

多謝主席。

主席：林香生副主席。

林香生：主席：

青年係社會嘅未來。針對青年築夢所遇到嘅困難，出台相應嘅政策，對於一個地區發展具有深遠意義。個人認為，喺改善澳門青年就業同創業，要做好以下幾個方面嘅工作。一係產業多元，拓寬咗就業嘅選擇；二係喺軟環境培育支撐青年創業；三係投入資源，拓展職業技能與知識培訓；四係倡導職涯規劃同職業價值觀嘅培養。

喺提升就業能力方面，可以做嘅作針對性嘅培訓有：溝通技能、團隊合作技能、問題解決技能、原創與進取技能、規劃與組織技能、自我管理技能、學習技能同科技技能等等嘅培訓項目。喺軟環境培育支撐青年創業方面，好似行業介紹、開業指引、項目評估、風險預測、行政管理、營銷手法等等嘅輔助舉措。

長官閣下：

我嘅問題係，針對青年築夢，喺就業同創業方面，特區政府會推出邊一啲嘅新嘅政策同舉措？

多謝。

主席：請行政長官閣下。

行政長官崔世安：多謝主席，多謝林香生副主席。

青年係我哋社會嘅未來，我跟林副主席嘅睇法一樣，好關心青年嘅成長，亦都同好多青年朋友，喺交流中聽取佢哋嘅意見同埋建議，更加聽取佢哋嘅設想，點樣去築夢。充分其實亦都睇到年青人嘅活力、創造力，同埋佢哋點樣希望能夠自己係融入去澳門未來嘅發展，同埋融入去國家嘅發展中有所作為。

政府其實喺協助青年就業方面，呢個競爭力，我哋係有加強教育職業培訓，激發創新思維，落實並優化面向青年就業指導支援嘅服務。亦都為青年係搭建平台，支持青年提升就業能力。喺創業方面，係優化完善青年嘅創業援助計劃，凝聚社會嘅力量去支持青創工作。協助青年參與區域合作。亦都係支持青年把握互聯網家嘅發展機會，創新發展。亦都係俾咗適切嘅人力資源同埋財政資源等去支持。

但係我覺得其實現在喺澳門成長嘅青年人，係比喺過去我哋幾代人都係個機會係多咗，亦都係幸福咗。大家都好清楚，我哋喺非高等教育範疇裏面，已經係有十五年嘅免費教育。而澳門嘅中學畢業生，進入高等教育機構嘅比例亦相當高。如果我無記錯嘅，係超過百分之八十五嘅。所以，係完成高等教育嚟講，係基本係可以達得到。

但係就業嘅環境，同埋創業嘅選擇，當然係一個青年人，佢完成咗佢嘅教育之後，佢生涯規劃嘅一部份。但係，喺就業裏面，我哋亦都睇到，喺澳門嘅高等院校畢業嘅同學，就業嘅機會亦相當高。我亦都回顧咗差不多過去，我哋呢個經濟高速增長嘅過程中，就業嘅機會亦相當好。創業亦都係俾咗咁多支持嘅措施、援助等等。

但係我覺得喺澳門嚟講，而家其實創業亦都不容易。同時做生意係真係有風險。因為就呢一個領域，我哋亦都睇到一啲研究，係同返做一種行業嘅，同質性係比較突出嘅。我舉例，譬如喺零售、餐飲呢啲行業裏面。所以佢創業裏面，係增加咗個風險，亦都係相當唔容易。

所以我覺得，喺呢一個支持青年就業、創業裏面，喺青年人可以考慮下，喺完成高等教育嘅時候，先喺工作裏面吸收一啲經驗，或者係增進自己嘅社交圈子、工作經驗，同埋喺工作裏面，學習到一啲真正與學校唔同嘅職業生涯。

而創業我係最擔心就係，創業嘅成功唔係一定，係會打擊

到啲青年人對自己嘅信心同埋對自己嘅未來嘅生涯規劃。因為而家睇到澳門嘅同質性嘅情況係比較多。因為呢個我哋政策研究室，亦都做咗一系列嘅研究，睇到政府去支持青年人創業，但係個同質性係相對比較高嘅。即係大家都做呢幾個行業，變咗個競爭自然增強，被淘汰嘅機會亦都係高。

創業嘅青年，如果佢無就業過，或者佢無做生意嘅經驗，其實相對亦都個困難度係比較高嘅。而且而家大家都睇到，作為一個初創業者，亦都面對好多風險同埋困難。所以喺政府嘅角度嚟講，我完全同林副主席嘅睇法一樣，係我哋嘅未來，我哋點樣好支持好佢，喺就業同埋喺創業。但係即係以個人嘅經驗嚟講，能夠喺就業吸收一啲經驗，再嚟到去創業，可能係好一啲。而創業可能係要豐富好自己嘅知識、經驗，同埋好多需要承擔嘅風險。因為政府係唔能夠保證創業一定成功嘅，所以年青人一畢業如果創業，個風險係更加高嘅。

多謝主席。

主席：馬志成議員。

馬志成：多謝主席。

尊敬嘅行政長官閣下：

本澳作為國際城市，每年都舉辦大型嘅活動同埋會議，例如澳門國際貿易投資博覽會、中葡論壇、大賽車等等。同時，特區政府致力構建世界旅遊休閒中心，每年都吸引大約三千萬遊客嚟澳門。而本地嘅人口亦有六十多萬，一旦發生傳染病、恐怖襲擊，或者係大型災難，後果將會係非常之嚴重。

對於傳染病嘅防治，我哋已經睇到特區政府嘅決心同埋政策，但災難嘅事故，隨時隨地，都係有機會發生，例如水災、風災、火災、冧樓，或者係大型嘅交通意外等等。加上全球嘅局勢都唔安全，恐怖襲擊時有發生。雖然好多意外係難以避免嘅，但事後嘅救治工作，佢直接影響到社會嘅穩定同埋市民對政府嘅信心。

請問行政長官閣下，澳門地方細，只有仁伯爵綜合醫院同埋鏡湖醫院稍具規模，如果一旦有大型嘅災難發生，要救治眾多嘅傷員，如何有效統籌各個政府嘅部門快速去處理災難嘅事故？喺醫療範疇，又將如何應對，保障居民嘅生命？特區政府

一直強調，同內地有完善嘅合作機制，如果澳門真係出現大型嘅災難，呢一個合作機制，又將點樣為本澳市民提供保障？

多謝。

主席：請行政長官閣下。

行政長官崔世安：多謝主席，多謝馬志成議員嘅提問。

政府喺任何時候，都係將我哋廣大居民嘅安全同埋健康放喺首位。一旦發生大型嘅災難事件，將運用我哋所有資源，係全力以赴咁保障好居民同埋旅客嘅生命安全。

喺 2012 年，行政長官批示，已經係設立咗突發事件應對嘅委員會。當有突發事件確定之後，係進行全面嘅協調、指揮、監督各個公共實體，採取緊急嘅措施，以應對突發嘅事件。呢個亦都係造成或者可能造成社會嚴重危害嘅自然災害、事故、災難、公共衛生同埋社會安全事件係包括在內。

政府亦都高度重視突發事件嘅應急能力。喺 1992 年重新修訂民防機制。喺 2004 年頒佈嘅《傳染病防治法》，2009 年突發公共事件嘅預警同埋警報系統，都係相應係有關嘅規定嘅。喺預警方面，突發公共事件嘅預警同埋警報系統，係清楚列明咗五級預警嘅級別，訂定咗各種嘅準則、行動計劃、救援部門等。一旦發生重大嘅災難，係馬上由行政長官啟動所有嘅部隊、公共行政部門、公共私人實體，係均須提供呢個協助嘅。

喺應對突發公共衛生事件方面，政府亦係專責統籌小組處理，係對各類型嘅傳染病同埋大型嘅公共衛生災難。我哋亦有呢個《傳染病嘅防治法》，裏面係好明確。當認定呢個傳染病係廣泛傳播嘅時候，將會由行政長官係作為呢個主持，係統籌整個行動。我哋一定係會以廣大居民嘅生命健康為主，不惜係犧牲呢個經濟嘅代價，係全力做好呢個統籌同埋預防，同埋控制嘅工作嘅。

亦都係定期會舉行各類型嘅演習，一旦發生大型災難，係通過咗分流嘅機制，亦都按傷重緩急，我哋亦都同係內地、香港，係有呢一個聯合嘅機制。呢個包括咗突發事件，包括咗突發公共衛生事件等等。

喺同廣東方面，粵澳亦都係有應急管理聯動嘅專責機制，係根據呢個“粵澳應急管理合作協議”而設立嘅。亦都構

建咗呢一個粵澳應急嘅平台，粵澳核事故嘅通報機制，粵澳緊急醫療及消防救援合作機制。參與國際性嘅民防會議，亦都優化咗本澳防災救災嘅機制嘅。我哋係有一套係突發事件嘅機制，一旦發生事故之後，就會隨即啟動。

多謝主席。

主席：鄭安庭議員。

鄭安庭：多謝主席。

尊敬嘅行政長官閣下、各位官員、各位同事：

下午好。

青年關係到澳門同埋祖國嘅未來。特區政府應從多角度了解現時澳門青年嘅個人現狀、社會觀，同埋政治觀三個範疇嘅意見同埋訴求，適時制訂出更適合青年人嘅政策措施。

澳門江門青年會剛剛完成咗“澳門青年現狀與訴求 2016”嘅報告。初步結果顯示，青年人對於社會現狀嘅滿意度，比 2015 年輕微下降。而樓價太高，無能力置業，成為青年不滿個人現狀嘅最主要原因。

目前，私樓價格高企，大部份青年人，只能申請公屋。雖然行政長官閣下及特區政府相關部門，一直強調居有所，安居樂業嘅施政理念，表示將會加快增建公共房屋，以回應市民訴求，但事實上，公共房屋一直未能滿足社會嘅需求。況且，相當部份，包括青年人在內嘅夾心階層，因收入上限不符合資格申請公共房屋，積蓄多年亦未能支付首期，眼見樓價日益攀升，雖心急但係又無可奈何。

夾心階層嘅問題政府已經講咗好多年，但係無採取具體嘅措施給予幫助。請問行政長官閣下，特區政府將如何落實居有所，安居樂業嘅施政理念？對於居民，尤其係青年人以及夾心階層嘅住屋需求問題，有何應對嘅措施？

多謝。

主席：請行政長官閣下。

行政長官崔世安：多謝主席，多謝鄭安庭議員嘅提問。

為落實居有所，安居樂業嘅公共房屋政策，政府正係透過修訂公共房屋法律制度，配合科學嘅分析，了解澳門居民實際嘅居住需求。

喺制訂公共房屋政策嘅時候，堅持慎用、善用嘅原則，優先係照顧弱勢群體。亦都按先後緩急嘅合理分配房屋資源。政府亦都委託咗學術機構研究本澳嘅居住狀況，掌握社會實際嘅需求，作為制訂長遠嘅公共房屋政策嘅參考依據。明年亦都會集中跟進社會房屋嘅修法工作，之後再開展經濟房屋嘅法律制度全面檢討。

並針對收入或者資產超過申請社會房屋所規定嘅限制，而未能承受普通私人樓宇價格嘅本澳居民，尤其係青年人，就係研究引入新類別嘅公共房屋嘅可行性。正係編製緊公眾諮詢文本，並開展相關嘅公眾諮詢工作，廣泛聽取社會嘅意見，去了解社會對新類別公共房屋意見同埋訴求，為本澳嘅居民，尤其係年青人，希望能夠提供多一個選擇嘅機會。

多謝主席。

主席：多謝長官。

請梁安琪議員。

梁安琪：多謝主席。

行政長官、各位官員、各位同事：

早前香港新一屆嘅立法議員中，幾位當選嘅青年嘅就職宣誓所引起嘅風波，唔單止要人大釋法，亦引起澳門社會熱烈討論年青一輩對國家觀念嘅教育。澳門特區政府，今年嘅千人計劃，同最近公佈嘅五年規劃草案文本中，都係將青少年培養包括愛國教育，列為特區政府施政方針同發展規劃嘅重點內容，但都係喺基礎上嘅培養。

澳門特區經過十七年嘅成長，愛國教育應在過去嘅普及基礎上更上一層樓，更深入持續培養對本澳有強烈歸屬感嘅精英人才，等年青人明白到，在國家同澳門嘅建設上，佢哋係參與者。請問長官，在小學、中學、大學教育中，如何加強從普及自深層次嘅愛國愛澳教育？對已經離校就職嘅青年呢啲群體，又如何做好普及甚至深入嘅愛國愛澳培養工作？

另外，現時樓價高昂，好多年青人為住屋而煩惱。建設青年宿舍類型嘅公屋，除咗解決年青人住屋嘅煩惱嘅同時，亦能增強佢哋對澳門嘅歸屬感。再次問長官，會唔會再考慮建設青年宿舍類型嘅公屋？亦都覺得逸園亦都係一個好地方。

多謝。

主席：請行政長官閣下。

行政長官崔世安：多謝主席，多謝梁安琪議員。

所以對於逸園狗場未來嘅利用，又多咗一個建議，就係青年嘅住房。

頭先我答鄭安庭議員嘅提問，亦都講咗我哋會研究新類別，係包括咗青年人嘅。呢個請放心，我哋會喺諮詢文本裏面，聽取廣大市民嘅意見。

愛國愛澳係澳門一個好優良嘅傳統，亦係澳門廣大居民認同嘅一個核心價值，有深厚嘅社會基礎。喺澳門特別行政區成立之後，愛國愛澳嘅重要內涵，係擁護中國對澳門恢復行使主權，擁護澳門回歸祖國，國家嘅認同。認同並服從國家嘅根本利益同埋長遠利益，包括咗國家嘅發展穩定同埋安全。亦都維護一國兩制嘅共同利益，嚴格執行澳門嘅《基本法》。愛國愛澳嘅精神係透過國家嘅認同，文化嘅認同，深深植根喺居民嘅共同價值觀念中，貫穿咗日常嘅生活。國家嘅發展以及對澳門特區嘅大力支持，係培養同埋實踐愛國愛澳核心價值嘅堅強後盾同埋重大推動力。

愛國愛澳具有共同嘅性質，普遍嘅意義。必須堅持內涵嘅共性同埋同一性，無分別等級同埋類別。政府將會致力全面推廣廣泛同埋持續嘅愛國愛澳教育，並支持靈活多樣，豐富多彩，有針對性嘅教育方式。

政府始終堅持鞏固同埋宏揚愛國愛澳核心嘅價值。注重從全面準確宣傳落實澳門《基本法》，提供廣泛嘅宣傳嘅解讀，讓《基本法》能夠堅實有力保障“一國兩制”喺澳門嘅順利實踐，齊心營造“愛國家，愛澳門”嘅社會氣氛，維持特區同埋和諧嘅安定大局。

喺梁安琪議員嘅提問裏面，我係好同意你嘅見解。我哋需要喺由非高等教育，以至到高等教育，以至到喺社會工作嘅人

士，都希望能夠喺唔同嘅層次，能夠宣傳推廣《基本法》。對愛國愛澳嘅教育等等係多做工作，亦都令到每一代人能夠延續呢一個核心價值嘅精神嘅。

多謝。

主席：黃顯輝議員。

黃顯輝：尊敬嘅行政長官閣下：

關於促進經濟適度多元，政府致力加快推動“一個中心，一個平台”嘅建設，把握國家“十三·五”規劃“一帶一路”嘅建設機遇，當中願景包括深化澳門作為世界旅遊城市、世界旅遊休閒中心嘅建設，完善自身嘅旅遊配套設施，推動有休閒旅遊朝多元化以及精品化嘅方向發展。

行政長官閣下：

請問政府有甚麼具體措施及方案，以推動上述各個願景得以落實呢？

多謝。

主席：有請行政長官閣下。

行政長官崔世安：多謝主席，多謝黃顯輝議員嘅提問。

旅遊業係澳門經濟嘅支柱產業，亦係整個社會經濟發展嘅重要動力。由於有著多項世界級大型嘅酒店同埋旅遊綜合度假嘅設施，可以為嚟澳嘅旅客，喺住宿、餐飲、購物、表演、會展、休閒、養生、娛樂等各個方面，提供多元嘅選擇。澳門已經係逐步發展成為具備文化、休閒、盛事、娛樂、商務會展元素嘅知名綜合旅遊目的地。我哋亦都係獲得聯合國世界旅遊組織讚譽為城市旅遊嘅出色榜樣。亦係獲得國際旅遊期刊係評為2015年最佳嘅休閒旅遊目的地嘅。

喺制訂發展規劃裏面，澳門特區嘅五年規劃，已經明確咗優質旅遊、精品旅遊建設為目標，從構建大旅遊、大休閒產業出發，深化旅遊業與各相關行業嘅互動、互補，共同發展。喺五年規劃裏面亦都目標指導下，澳門旅遊業嘅總體規劃編製明年將會完成，總體嘅規劃每項嘅目標均相應於短中長期嘅策略，有序咁樣去落實。

根據《公共工程承攬制度》，以及《項目合同》嘅條款，係歸責呢個承建商。倘若有關項目係超出兩年嘅保固期，但係問題證明屬於工程承建商嘅責任嘅時候，政府必定要求承建商負責，並考慮延長項目嘅保固期。喺未來我哋會持續總結經驗，加強對設計公司、監理公司、承建公司嘅督導工作，以提升公屋嘅質量。

多謝主席。

主席：陳美儀議員。

陳美儀：多謝主席。

行政長官：

我一直都係主張對低收入嘅弱勢群體係更多嘅關注，喺呢方面，政府都做咗好多嘅工作。但係今日想提嘅就係中等收入嘅階層，呢個階層就係，根據政府嘅數據顯示，2016 年第三季度，本地就業嘅居民就係有 28 萬嘅，其中收入係一萬到三萬嘅，就有 172,000 人，佔大約係六成，覆蓋咗大部份嘅而家嘅教師、中基層嘅公務員同埋啲投入社會工作嘅大學生嘅。喺呢方面，佢哋都承受住生活嘅一定壓力嘅。

而家我就講下稅務方面。喺稅務方面，噶日你公佈，就係最高減免嘅稅都係一萬二千蚊，而佢哋全部都係大部份係要交稅嘅。喺呢方面，澳門現時，就係無具體恆常性嘅條文，同埋有鼓勵嘅功能，去扣減稅制嘅。亦都係唔能夠真正係體現稅務嘅實際意義嘅。對於鄰近嘅地方，對於係已婚人士、供養父母、育有子女，同埋傷殘人士，都係有一定嘅稅減嘅優惠嘅，但係我哋澳門就係無嘅。呢一啲群體，佢哋上樓申請經屋，亦都係有一定嘅困難，買私人房屋亦都係太貴賣唔起。喺呢一方面，政府完全係無政策去優惠佢哋嘅。

我想問下行政長官，嚟緊你有啲乜嘢嘅政策，喺稅務方面，如何可以優化對呢一啲嘅群體？另外就係話，仲有啲乜嘢嘅政策，可以扶持返呢一班嘅人嘅呢？

多謝。

主席：請行政長官閣下。

行政長官崔世安：多謝主席，多謝陳美儀議員嘅發問。

我諗係我喺稅制嘅修改方面，首先作一啲回應。特區嘅稅務法律，事實上係用咗好多年，政府亦都承諾，明年將會全面檢討有關稅務嘅制度。

近年來，特區政府亦因應經濟同埋社會嘅發展，進行咗多項稅制嘅修改。亦都包括咗《職業稅章程》，喺回歸後亦多次嘅修改。亦都係關於《職業稅章程》裏面嘅職業稅復評委員會嘅組成，以及有關部門亦持續進行該法嘅研究修訂工作。喺 15 年，亦都完成咗《消費稅規章》、《機動車輛稅規章》，而家亦啟動緊《印花稅規章》嘅修改工作，對於呢個融資租賃嘅稅務開展立法等等嘅工作。

我諗剛才提出嘅問題，係睇到整個澳門嘅工作人口裏面嘅覆蓋面比較大嘅一群嘅收入情況。我諗其實係客觀存在住喺好多唔同嘅國家或者地區，稅收嘅問題，所謂中層或者夾心階層裏面，佢既唔係申請到福利，佢亦都係需要交稅，而亦都唔係高收入，我諗陳議員係想關心呢一批嘅人士。我哋會研究一下，對於呢啲中等收入嘅人士。因為剛才陳明金議員第一條嘅問題亦都係關係到呢一批人士。點樣我哋能夠通過第二次分配，喺稅務嘅優惠，或者其他多點支撐裏面俾到佢哋嘅。

另外住屋方面，今日因為亦都回應咗好多，主要都係土地嘅供應能夠提高，係建更多嘅房屋，包括公共嘅房屋同埋私人嘅房屋，我哋係會關心嘅。但係客觀係事實存在嘅，因為稅務制度裏面，我諗唔係單係澳門，喺唔同嘅國家地區亦會存在著所謂呢個夾心階層嘅問題，我哋亦會關心嘅。特別係從一啲長效機制裏面去關心，包括咗教育、醫療，呢啲嘅住房等去關心呢一群嘅。覆蓋咗多嘅人，我哋會承諾去重視。

多謝主席。

主席：吳國昌議員。

吳國昌：行政長官閣下：

在你嘅連任嘅政綱裏面，明文承諾，按照《基本法》規定，穩步推進民主政制發展。另一方面，本人亦都喺行政法務嘅施政辯論裏面，亦都公開提交過一份科學隨機抽樣嘅澳門居民民意調查結果，證明六成嘅澳門居民係贊成行政長官應該改由我哋澳門居民一人一票選舉產生。支持嘅當中，三分之二認為應該爭取在 2019 年實行，亦都同時係多數居民亦都期望盡快讓立法會直選過半。

從批判嘅角度思考，小圈子選特首嘅政治制度已經形成咗官商勾結、親疏有別、利益輸送。而高官問責從未落實嘅困局應該及早改變。有志領導澳門嘅人，應當接受居民一人一票選舉，接受全民嘅監督嘅。

從大中華嘅角度思考，澳門特區現在被譽為“一國兩制”成功實踐嘅熱土，更加應當掌握時機，讓澳門人實現真普選，證實“一國兩制”嘅優越性。

下一次嘅行政長官選舉將會喺 2019 進行。要落實政改必須行政長官去啟動程序，現在行政長官係咪應該及早立即去啟動，爭取 2019 特首換屆嘅時候，喺嚴格遵守澳門《基本法》嘅基礎上面去改進我哋行政長官嘅選舉制度，嘗試開放行政長官提名嘅方式，建立全民一人一票選出行政長官嘅制度，循序漸進發展出真嘅民主政制，真正嘅普選呢？希望特首能夠給予正面嘅回答。

主席：請行政長官閣下。

行政長官崔世安：多謝主席，多謝吳國昌議員嘅提問。

根據澳門《基本法》附件一嘅相關規定，第五任以及以後各任行政長官產生嘅辦法如須修改，係須依照法定程序進行。行政長官普選屬於特區政制發展嘅範疇。特區嘅政制發展，主導權同埋決定權係在中央政府。行政長官由一個具有廣泛代表性嘅選舉委員會選舉產生。適應當前澳門社會發展水平同埋實際情況，係得到澳門社會各界嘅肯定同埋認同，應當長期保持不變。

特區政制發展必須嚴格遵守《基本法》同埋全國人大常委會嘅決定，從澳門嘅實際情況出發，堅持四個有利於嘅原則：有利於澳門特別行政區基本政治制度嘅穩定，有利於行政主導政治體制嘅有效運作，有利於兼顧澳門社會各階層、各界別嘅利益，有利於保持澳門長期繁榮穩定同埋發展。

當前，澳門發展正處於深度嘅調整期，特區政府首要嘅任務，係維持社會嘅繁榮穩定，促進經濟適度多元發展，完善民生保障制度，改善同埋提高居民整體嘅生活素質。喺民主政治發展方面，特區政府將嚴格按照“四個有利於”嘅原則，係保持基本政治制度穩定嘅前提下，持續優化選舉環境及提高選舉嘅品質，循序漸進地推進民主嘅政治發展。

多謝主席。

吳國昌：特首啟動政改……

主席：唐曉晴議員。

唐曉晴：主席、行政長官閣下：

嚇咗一跳頭先，突然之間……我準備緊嘅。

隨著近年嚟賭收下滑，我哋政府嘅財政狀況已經無幾年前咁寬裕。儘管政府都維持咗大部份民生福利措施，但係公共部門嘅開支，係呢幾年係喺度削減嘅。呢種量入為出嘅理財思路無可厚非，亦都係我哋按照呢一個《基本法》嘅精神嘅一種適合嘅做法。但係喺一啲重要嘅領域，好似基礎教育、高等教育，政府嘅資助減少，可能導致佢嘅運作困難。而喺呢一個教育方面嘅投入減少，又將會反映到我哋下一代嘅呢一個人才培養，同埋我哋社會競爭力上面。

雖然話巧婦難為無米炊，但係而家澳門嘅經濟似乎仍然係可以嘅，未到到呢個人不敷支嘅狀況。我哋都話未來係年青人嘅，而年青人嘅未來，好大程度上取決於良好嘅教育。請問長官閣下，喺特區經濟尚有餘力嘅情況下，是否有可能喺教育方面保持，或者有可能就增加投入呢？

主席：請行政長官閣下。

行政長官崔世安：多謝主席，多謝唐曉晴議員嘅提問。

教育係關乎於澳門每一代人嘅幸福，亦係整個社會競爭力嘅基礎，因此特區政府係堅持“教育興澳、人才興澳”嘅施政理念，積極咁樣按照五年發展規劃嘅部署。喺未來嘅幾年，教育嘅開支佔政府嘅總開支比重，每年亦有所提高。

政府每年對教育資源投入都係增加嘅。有關教育領域嘅開支，喺 14 年嘅時候，係 100.79 億元預算。其後三年嘅預算，平均係每年增長百分之 4.7。去到 2016 年嘅預算，係 114.1 億元。2017 年嘅預算，係 115.6 億元。喺 11 年到 14 年五年間，非高等教育嘅公共開支，增長係百分之 15.2。高等教育嘅公共開支，年增長係 19.54%嘅。

雖然近年澳門確實處於一個經濟嘅深度調整，但係我哋係

從一個著眼長遠規劃。我哋係會一如既往，喺政策資源上，係大力支持教育嘅發展，亦擺喺我哋嘅優先次序。按照五年規劃嘅部署，喺 2020 年，教育嘅職能佔政府財政開支嘅比重，亦都係每年咁樣增加嘅。

多謝主席。

主席：陳澤武議員。

陳澤武：多謝主席。

行政長官閣下、各位官員、各位同事：

聯合國世界旅遊組織 UNWTO 今年九月發表有關研究引述，近年全球體育旅遊嘅市場，估值達八千億美元，佔國際旅遊同埋旅遊收益總值嘅超過一成。嗰個研究又強調，發展體育旅遊，不僅有利於旅遊服務出口，同埋旅遊目的地嘅市場再定位。同時，亦都能夠增強當地居民嘅自豪感，同埋社區嘅正能量。

澳門特區五年發展規劃指出，未來本澳發展定位係世界旅遊休閒中心。請問行政長官閣下，特區政府就本澳體育旅遊發展，有何綜合且具體嘅規劃？通過其直接、間接或者係引申嘅效應，以促進本澳經濟持續增長呢？

多謝。

主席：請行政長官閣下。

行政長官崔世安：多謝主席，多謝陳澤武議員嘅提問。

根據呢個聯合國世界旅遊組織體育旅遊國際會議，喺今年九月嘅技術報告指出，體育旅遊嘅廣泛被認同嘅定義，就係由於商業或非商業嘅原因，需要旅行離開家庭或工作地點，並以任何鬆散或者有組織嘅形式，主動或者被動嘅方式，參與咗體育嘅運動嘅。

而佢嘅體育旅遊嘅分類上，係分為五種嘅：個人或者團體積極參與體育項目或者體育盛事，個人或者團隊進行自我發展嘅強化訓練，以觀眾或運動支持者嘅身份去觀摩、觀看體育運動，參觀同埋以運動或運動項目嘅傳奇歷史傳承或者文化相關地點，通過體育運動改善健康嘅生活素質。而其他嘅方式，亦

有運動盛事嘅旅遊，例如奧運會、世界杯，主動運動體育旅遊，以個人休閒嘅方式參與體育旅遊，以及懷舊式嘅旅遊，參觀呢個體育相關嘅景點嘅。

世界嘅旅遊組織統計，14 年體育旅遊嘅市場規模，係達 1,800 億美元嘅。估計喺 2020 年，係會突破 4,000 億美元。而喺網上體育新聞直播平台，係估計體育旅遊嘅產業價值，係有 8,000 億美元，約佔世界旅遊嘅收入係百分之十。

我諗剛才陳澤武議員提出嘅，係一個我哋好有可行去推廣嘅旅遊方向，我哋亦都好認同。因為澳門亦都有好多嘅體育盛事係辦咗超過十年或者以上，亦都吸引到一定嘅旅客。我諗我哋從長遠嘅規劃，係支持呢個方向。亦都會係落實係幾方面嘅工作，一方面宣傳推廣既有嘅盛事項目喺體育方面。另一方面喺未來係咪積極去爭取更多綜合或者國際嘅大型賽事嚟到澳門舉辦，另一方面亦都係關係到我哋嘅與歷史文化有關嘅體育方面嚟到吸引客人，喺呢幾方面係加強工作。

喺體育旅遊方面，事實係一個好龐大嘅市場，我哋從統計嘅數據亦都睇到，係佔咗世界旅遊市場嘅十分之一，所以係一個好值得推廣嘅方向。但喺呢個工作，我相信除咗政府，民間嘅組織同埋體育界亦都係係要積極參與，共同去發展呢個方向嘅。我哋係好同意嘅。

多謝主席。

主席：多謝長官。

歐安利議員。

Leonel Alberto Alves: Sr. Presidente, obrigado!

Sr. Chefe do Executivo Exa..

No mês passado realizou-se em Macau o Fórum Industrial para a Cooperação Económica entre a China e os Países da Língua Portuguesa.

O evento foi um êxito, por todos o reconhecido e o papel de Macau saiu reforçado como a verdadeira plataforma económica e comercial. Deram-se passos sólidos e definitivos no sentido de no século 21, a todos os níveis a interação entre a China e os Países de

Língua Portuguesa não constituiu apenas uma realidade presente mas sim, um caminho irreversível a percorrer por todos, tendo por objectivo um constante aprofundamento do intercâmbio e o estreitamento das relações multilaterais.

Nesta vertente, Macau poderá e deverá ser o ponto de encontro entre o Direito Chinês e o Direito dos Países Lusófonos.

Macau só será um verdadeiro centro de negócios se simultaneamente também for um centro de diálogo entre Juristas, Académicos, Magistrados e Advogados destes Países.

Gostaria de perguntar a Sua Exa. o Sr. Chefe do Executivo, o que pensa sobre a promoção de Macau no centro de encontro com Juristas de China e dos Países Lusófonos com a finalidade de criar as bases para elegerem futuramente Macau como local para celebração de negócios complementado pela existência de um Centro de Arbitragem o qual se revestirá de grande notoriedade e credibilidade com a intervenção de reconhecer especialistas de todos estes países. Muito obrigado!

(**歐安利**：多謝主席。

行政長官閣下：

上個月在澳門舉行了中國-葡語國家經貿合作論壇部長級會議。

會議取得了有目共睹的成功，澳門作為真正的經貿平台的作用也得以加強。同時，邁出了堅定的步伐，使二十一世紀中國與葡語國家之間在各領域的互動不安於現狀，而是向著不斷深化交流和密切雙邊關係的方向勇往直前。

在這一方面，澳門能夠也應該成為中國法律與葡語國家法律的交匯點。

澳門要成為真正的貿易中心，就必須同時成為這些國家法律人員、學者、法官以及律師進行對話的中心。

請問行政長官閣下：

關於將澳門打造成中國及葡語國家法律人員的交流中

心，為今後澳門成為簽訂貿易協議的候選地點打好基礎，並輔以一個仲裁中心，通過上述國家知名專家的參與，確保其聲譽及信譽，您是如何考慮的？

多謝。)

主席：請行政長官閣下。

行政長官崔世安：多謝主席，多謝歐安利議員嘅提問。

澳門成為呢個中葡法律專家嘅交流中心同埋仲裁中心嘅設想，歐安利議員提出嘅，係好值得我哋深入去思考同埋研究。

喺近幾年嚟，中央政府嘅大力支持，同埋特區政府嘅努力下，澳門作為中國與葡語國家商貿合作平台嘅地位同埋作用，係越來越得到發揮。喺呢個嘅大背景下，作為呢個合作服務平台組成嘅部份，我覺得法律服務嘅工作，係自然會提升到去一個日程嘅之上嘅。

法律服務工作嘅展開，當然首先需要相關法律制度嘅專家學者同埋研究交流實踐嘅活動，但係呢啲嘅工作活動，亦需要以豐富活躍嘅商貿活動作為發展條件。亦即係講，一個法律專家交流中心嘅形成同埋佢嘅活動，係需要一定嘅社會條件、環境。同埋呢個中心嘅形成之後，當然亦都會促進相關領域實踐活動嘅發展，兩者之間係會相輔相成。

至於建立仲裁中心，實際就係建立多元糾紛解決嘅機制嘅問題。對於呢個問題，特區政府喺 2014 年，係已經完成咗澳門多元糾紛解決機制嘅研究，目的就係要推動促進澳門建成一個多元糾紛解決嘅機制，即傳統司法領域以外嘅機制，包括咗仲裁、調解、和解等嘅制度。其主導嘅思想，就係要喺澳門建設具有“一國兩制”優勢，同埋一流嘅法律專家參與，享有區域甚至國際間影響力，同埋公信力嘅仲裁同埋調解中心。“一個平台”嘅定位及其形成，使到澳門有必要、有條件，更有優勢係建立上述特徵嘅仲裁機構。

歐議員嘅提出同埋整個思考，我哋覺得好值得去研究。因為已經係確定咗澳門作為中國葡語國家商貿合作服務平台。今次總理嘅到訪，亦都加強咗大力嘅支持。所以呢一個作為一個發展嘅方向，同埋喺硬件方面亦都會建立呢個綜合體，我覺得係好有價值，我哋從呢一方面去推進。但係最重要，就係剛才所講嘅，商貿活動嘅發展條件，嚟到去支持呢一個嘅中心。所

以我覺得係我哋會好慎重去研究，嚟到配合初步點樣去推動呢個嘅發展。

多謝主席。

主席：陳亦立議員。

陳亦立：多謝主席。

尊敬嘅行政長官閣下：

器官捐贈係用一個終結嘅生命，去延續另一個生命嘅重生，係一個社會文明嘅標誌。鄰近地區一直大力宣傳器官捐贈嘅意義，澳門社會上對呢一個工作亦都有好高嘅期望。唔少嘅市民亦都希望本澳可以有條件同埋機會，盡快開展相關工作，造福澳門。

過去，特區政府喺回覆議員質詢時，一直強調，雖然本澳已有相關嘅法律，但因未有腦死亡嘅標準，因此無法進行器官移植。今年，特區政府已經頒佈咗醫療事故同埋實質器官移植等重大法律配套，標誌著本澳嘅醫療服務取得兩項重大嘅進展。

特區政府近年又通過重新委任生命科學道德委員會嘅委員，制訂咗腦死亡嘅標準同埋規則，為本澳嘅器官捐贈、摘取同埋移植行為嘅合法性，確立咗法律嘅框架同埋基礎，本人係十分認同同埋支持嘅。

然而，對於本澳來講，器官捐贈同埋移植，係一項全新嘅工作，更涉及專業技術嘅應用，難度十分大。請問行政長官閣下，喺推動器官捐贈同埋移植，特別係人員培訓、輪候登記、技術發展、宣傳推廣方面，是否已經訂定咗全套嘅方案？未來將如何循序漸進推動本澳器官捐贈同埋移植嘅發展同埋實施？

多謝。

主席：請行政長官閣下。

行政長官崔世安：多謝主席，多謝陳亦立議員嘅提問。

雖然醫療技術同埋科技不斷進步，但器官移植依然係器官

衰竭病者延續生命嘅希望。政府同埋醫務界，通過嚴格科學論證同埋本地嘅立法，希望係讓有需要嘅病人，可以透過器官移植係獲得新嘅生活。

其實早喺 1996 年，通過呢個 2/96/M 號法律，規範人體器官及組織之捐贈、摘取及移植。以及喺 98 年，呢個 12/98/M 號法令，有關死後捐贈人記錄，及捐贈人個人咁嘅發出。本澳喺器官捐贈行為方面，的確係有明確嘅法律規範嘅。

政府喺今年，亦都頒佈咗實施腦死亡嘅標準同埋判斷、判定指引等嘅法例。本澳已經有腦死亡嘅標準同埋規則，亦標誌著本澳嘅器官捐贈工作，係邁出重要嘅一步。當前澳門正係培訓腦死亡鑑定嘅工作隊。已有來自本澳三間醫院，共有 32 名專科醫生，係接受相關嘅培訓。

器官嘅捐贈同埋移植，喺澳門嚟講係一項全新嘅工作。我好同意頭先陳議員所講，包括咗宣傳推廣、輪候登記、人員嘅培訓同埋技術上，係需要一系列嘅工作嘅，呢個係專業方面，係點樣做好整個專業團隊嘅工作。

喺宣傳推廣方面，因為係確立咗腦死亡之後而進行嘅一列程序，我相信澳門人點樣能夠係去接受。而作出呢一個大愛精神，人道主義嚟到去捐贈器官，係有一個過程係點樣去令澳門人明白。因為我哋參考鄰近嘅經驗，亦都係相當困難嘅。我亦都學習咗，亦都係相當不容易。有一啲例譬如個病人或者呢個過身嘅人，佢生前就算同意，佢過身之後，佢嘅親人好多亦都唔同意又有，有好多情況出現。

所以呢個我諗係宣傳推廣同埋輪候登記方面，依然有大量嘅工作。除咗我哋嘅專業團隊之外，我諗呢個可能係要有一段時間，有呢個法律基礎去支撐，嚟到去做呢個工作。但係我好同意，喺澳門嚟講，係去發展呢一方面，讓澳門嘅人，係能夠以有大愛嘅精神，人道主義嘅立場，係作出佢嘅自由選擇。因為正如剛才閣下嘅提問，佢係延續咗一個人嘅新生活。

多謝主席。

主席：崔世昌議員。

崔世昌：多謝主席。

行政長官閣下：

我想講一講本澳嘅職業教育，或者係可以講係技能教育方面嘅問題。

本澳嘅職業教育發展，一直未能得到政府同埋社會嘅足夠重視。職業教育嘅問題，必須盡快形成規範同埋規劃，否則對本澳整體人才嘅發展政策而言，將會形成一種衝擊。而對未來本澳嘅長遠發展，人才培養嚟講，又容易出現呢個失衡嘅現象。

社會嘅均衡發展，對於各種人才需要、需求，係必然嘅多元嘅，呢點亦都係社會發展同埋分工嘅自然規律所決定嘅。因此，對於社會整體人才培養，需要配合嘅係社會整體嘅發展狀況，而唔係僅僅只集中培養某啲特定嘅產業人才。

除咗“一中心，一平台”嘅深化建設以及特區政府五年規劃嘅逐步落實，政府對於精英人才以及專業人才嘅培養，當然係必不可少。但係與此同時，亦都唔能夠忽略對技能人才嘅培養，而且係要有序咁培養呢啲技能人才。盡快制訂呢個技能教育嘅相關規範，就係最基本而且係最重要嘅一步。

為此，請問行政長官閣下，本澳有關職業技術或者係技能教育嘅法規，立法嘅進度如何？能否喺 2017 年提交立法會審議？

多謝。

主席：請行政長官閣下。

行政長官崔世安：多謝主席，多謝崔世昌議員嘅提問。

職業技術教育，作為教育及人才培養長效機制，係重要組成嘅部份，特區政府十分重視。透過加強職業技術教育嘅場地、設施、課程等方面嘅建設，亦都著手完善相關嘅法規同埋制度，以提升居民嘅專業及就業能力。

喺五年規劃中，已經將訂定職業技術教育法規，列為提升發展非高等教育嘅重要工作之一。教青局一方面委託咗專業機構，完成呢個澳門職業技術教育發展嘅模式研究，另一方面，亦開展職業技術教育法規嘅修訂工作。政府喺吸納咗研究報告嘅相關意見同埋建議，草擬咗法規嘅初稿同埋諮詢文本，係訂於喺明年嘅年初公開諮詢，爭取喺明年係進入呢個立法嘅程序嘅。

多謝主席。

主席：馮志強議員。

馮志強：多謝主席。

行政長官閣下：

澳門特區五年發展嘅規劃已經公佈實施，關鍵係要抓好落實。首先係應該由政府各職能部門，根據規劃嘅目標，制訂各自所管轄工作嘅範圍嘅實施同埋細則，並負責落實。

政府係負責檢查督促，但係規劃提出要設立第三方嘅評估機制，而相關嘅工作由建設世界旅遊休閒中心委員直接跟進同埋重頭協調。請問長官閣下，政府嘅工作為甚麼還要設置第三方嘅評估機制呢？那麼，司長嘅工作責任又去咗邊度呢？如何去體現高官問責制？喺國內制訂“十三·五”規劃，國務院也沒有提出，要設立第三方評估機制，去評估落實嘅情況。而特區政府作出這樣嘅決定嘅出發點又係甚麼呢？

多謝長官。

主席：請行政長官閣下。

行政長官崔世安：多謝主席，多謝馮志強議員嘅提問。

規劃係未來五年發展總體藍圖同埋行動綱領，係希望能夠得到全市民嘅參與。引入呢個第三方評估檢查嘅機制，目的就係讓社會共同參與，規劃目標嘅落實。已經委託咗理工學院擔任相關嘅工作，係從一個專業同中立嘅角度出發，提供意見俾政府參考嘅。

呢個我哋亦都喺整個五年規劃嘅工作過程之中，係多次去到國內相關嘅部委同埋高等教育研究機構去取經嘅，係吸收咗國家制訂規劃嘅經驗所設嘅第三方評估機制。

國家嘅法改委，喺 2008 年，係邀請咗清華大學胡鞍鋼教授嘅團隊、世界銀行駐華嘅辦事處、國務院發展研究中心，作為第三方評估檢查嘅機構。喺 13 年，就改為邀請咗兩家，清華大學嘅胡鞍鋼教授團隊，中國經濟改革研究基金會國民經濟研究所。我哋係去到清華大學取經，亦都係邀請咗清華大學胡鞍鋼教授嘅團隊，俾咗好多指導性嘅寶貴意見喺我哋呢個五年規劃

嘅工作過程中嘅。

第三方評估係引用目標一致法，對中期及後期，完成或未完成嘅指標係進行評估。目前，清華大學胡鞍鋼教授嘅團隊，專門就評估係構建成為呢個數據庫嘅。國家規劃公佈後，會明確各個部門所負責嘅項目同埋任務，一般從規劃實施嘅第二年開始評估，並長期跟進。

編製五年嘅規劃，係離唔開綜合平衡各司嘅施政工作嘅，亦唔能夠離開民意嘅基礎。所以剛才閣下所提嘅，亦係相當合理，政府係應該有佢評估同埋監督嘅機制。喺規劃編製前，要求各司提交嘅五年工作規劃，係按環境嘅分析、理念、目標，主要任務、施政措施，嚟到去分解自身嘅施政工作。透過各類型嘅工作會議，係組織增強咗跨部門工作協同嘅效應，健全呢個政務會議嘅監督規劃嘅落實，協調各司嘅施政，提升執行力係重要嘅保證。現在有嘅季度報告制度，將會加強喺目標監測同埋管理，亦都完善績效評審同埋官員問責推進嘅規則嘅落實。

喺增強呢個建設世界旅遊休閒中心委員會與中國與葡語國家商貿合作服務平台發展委員會嘅互相配合，互相協調嘅能力，規劃嘅文本係先後兩次經過五個月，係民意嘅收集。尤其是我哋係去到北京，係獲得中央部委嘅支持，亦都先後聽取咗 18 個部委嘅意見，係獲得到支持嘅。

喺完善有檢查機制釐訂新嘅監督措施，建設世界旅遊休閒中心委員會將會按實際嘅需要，係設立呢個檢查規劃實施嘅專責工作小組，嚟到去監督規劃執行嘅情況。喺開展規劃嘅細化工作方面，對各項指標進行監察，加強相關人員嘅學習工作，培訓工作，以做好規劃裏面執行同埋監督嘅工作。

多謝主席。

主席：張立群議員。

張立群：主席、尊敬嘅行政長官閣下：

其實我今日嘅問題，同馮志強都類似差唔多。特首都笑緊。其實你答嘅問題已經喺我嘅想問嘅嘢，如有類同，實屬巧合，唔係炒作。

其實我就都講就話，促進政府績效治理，呢樣嘢係好事嘅。但係如果要第三方評核，評估呢個機構將來嘅發展同埋服

務，到底你係咪即係做呢個規劃裏面嘅時間，覺得有啲地方，係無人監管得到？或者你哋睇唔到嘅意料發展，或者呢個，同埋有無一個評估，就話呢啲評核對個某部門做嘅嘢，有無佢做得好與壞？有無職責？或者你就係，嗰個權責相當於個文化行政責任。

行政同權，有無一個規定要點樣審核出嚟？對呢啲部門，有無一個點樣處理如果有問題嘅時候？

多謝。

主席：請行政長官閣下。

行政長官崔世安：多謝主席，多謝張立群議員嘅提問。

剛才喺答馮志強議員嘅提問，答咗一部份。我諗張議員所關心嘅就係返政府內部，司、局、廳、處，我諗基本上佢哋嘅權責。根據五年規劃嘅目標，佢要完成嘅工作，喺個績效評估方面，呢個係返政府內部，係會有效咁樣監管，同埋係績效評估佢有無達到工作嘅目標嘅。

至於第三方評估嘅概念，其實就係一個外部嘅評估，佢嘅優勢就係專業、中立。同埋亦都係透過嚟到聽取民意，係對政府嘅工作表現嘅。所以政府嘅一部份，係由返政府去監督佢有無達到目標管理。而喺客觀嘅第三方評估，就係一個外部評估，有佢嘅專業、中立同埋社會聯繫，更加希望透過第三方聽取民意。

多謝主席。

主席：各位議員：

再次多謝行政長官閣下、行政會委員和各位官員列席今日嘅會議。

行政長官全部回答了報名提問的三十二位議員的問題。

在此提醒一下，下星期二開始 2017 年度施政方針政策各相關領域的辯論，請各位議員做好準備。

現在宣佈散會。

翻譯：翻譯辦公室

文牘：編輯暨刊物處

